




~~15~~ ~~57~~
27-20

14-22-63



RENATI DES-CARTES MEDITATIONES DE PRIMA PHILOSOPHIA,

In quibus adjectæ sunt, in hac ultima editione,
utilissimæ quædam animadversiones, ex
variis, doctissimisque Authoribus col-
lectæ; cum Authoris Vita brevi-
ter, ac concinnè conscripta.

et hujusmodi. c. 4.



AMSTELODAMI. MDCCIX.

AD ERUDITISSIMUM,

Et Jureconsultissimum Virum

JOSEPHUM
DE ANGELIS.

N. N.

S. P. D.



Etus, ac ferè perpetua,
inter Scriptores con-
suetudo est ex omni
genere libros, qui in
publicam emittuntur
lucem, non nisi hominibus, vel
clarissimorum natalium munere,
vel optimarum artium studio, aut
honestorum morum probitate
exornatis libenti, ac æquo animo

a 2 di.

dicare. Nam Auctores, vel grati
animi memoria selectissimos sua-
rum cogitationum fructus, tan-
quam amplissimum, magnificen-
tissimumque munus in volumini-
bus paratum, atque reconditum
ipsis dare existimarent: aut eo-
rummet volumina aliquibus di-
canda duxerunt, ut à maledictis,
censurisque Obtrectatorum im-
probis ad ea tutanda, conservan-
daque valuissent. At quamquam
acutissimi Renati Des-Cartes Me-
ditationes ex uberrimis Metaphy-
sicæ fontibus, sinè erroris crimi-
ne haustæ, creptæque videantur:
ideòque ab hominibus in sapien-
tiæ studio exercitatis, non solum
summis extolluntur laudibus;
sed

sed inter rara , & stupenda hu-
manæ mentis miracula reponan-
tur ; tamen cuicumque hæc ea-
dem secum animo reputanti haud
obscurè patebit, libellum hunc
mole exiguum , usu rerum ma-
gnum, ob tot, tantorumque in me
beneficiorum tuorum magnitudi-
nem potius, quàm defensionis ne-
cessitudine, grati, mutuique animi
ardore incensum, atque commo-
tum, velut insigne quoddam amo-
ris erga te mei pignus, me tibi di-
casse : imò cum certè sciam in hac
præclarissima, & florentissima Ci-
vitate, totaq; ferè Italia neminem
exercitatione dicendi præstantio-
rem te esse, si fortè quis iniquo, ve-
nenatoque dente has Meditatio-

nes, non dicam obscurare, sed ob-
umbrare conabitur, non ingenti
molimine, te ipsas tutari facili ne-
gocio posse existimo; nam, quæ
tanta est vis, quòd flumen ingenii,
quæ copia, quæ denique luculen-
ta, atque ornata oratio, quæ non
in foro, ac Senatu tantum, verum
etiam inter domesticos parietes,
inter colloquia amicorum, in ne-
gociis gerendis, exequendisque, in
publicis, privatisque rebus consu-
lendis, à te copiosè fluxisse non vi-
deatur? Porro hæ Renati Des-Car-
tes Meditationes, ut omittam Fa-
miliæ, domusque tuæ dignitatem,
ingenii, animique tui dotes, tibi ju-
re debentur: quoniam tam tibi
arridet diligens, & accurata ipsa-
rum

um analysis, ut sæpè numero præ-
clarissimam tuam vocem audivi-
mus prædicantem, nullam Meta-
physicorum meditationem, nul-
lamque veterum, novorumque
Philosophorum lucubrationem,
tàm menti nostræ proficuam esse
ad veritatem indagandam tàm
aptam, idoneamque, quàm has, quæ
denuò nunc typis, publicæ utilitati
consulendi studio, proditæ sunt, &
quas tibi sacrare institui. Prætereà
autem efficax, mirabilisque elo-
quentia jamdiù adulterata, & cor-
rupta his nostris sanè temporibus,
ope sanioris Philosophiæ ab impe-
ritorum injuriis, præjudiciisque
vindicata, & in pristinam sedem
reducta, in qua à Demosthene, Ci-

cerone, aliisque disertissimis Ora-
toribus locata fuit: tunc profectò,
Sapientum judicio compertum est
germanam, veracemque differen-
di artem non in verborum, argu-
mentorumque confarcinatione,
sed in exquisitarum recta ratio-
num dispositione, & verborum
proprietae, cum gravitate, digni-
tateque sententiarum, cum sele-
ctissimorum numerum jucundi-
tate conjunctam, sitam sine dubio
esse. Hujus tam præclari facinoris
neminem nisi Renatum ætas no-
stra habet Auctorem; nam stre-
nuus ille, fortissimusque vir, terri-
bili mentis suæ acie propè dele-
tam, ac profligatam à barbarie elo-
quentiam, ab interitu vindicavit.

Quo;

Quoniam Philosophiam, ac Meta-
physicam, unde omnis orationis vis,
ac robur fluit, & tanquam à sua-
met origine manat in immensam
oblivionis profunditatem demer-
sas longo, atque fervido accura-
tarum Meditationum labore re-
traxit in diem, & robusta dextera
sua nobis porrecta, nos à profun-
dissimis, foeditissimisque ignaviae
faucibus penitus erexit, liberavit-
que. Qua de re non est mirandum
si tu ab ineunte ætate, cum non
solum amplum, immaculatumque
pectus, sed linguam purgata, ac
feraci Philosophia imbueris, tanta
copia, tanta ubertate, tantaque in-
credibili orationis vi polleas, vera-
cissimisque rationibus, sententiisque;

abundes, ut vana, futilia, inania, & levia ab orationis tuæ decursu facillimè secernere possis, & probata tantùm solida, perspicua inferendo, indissolubili nexu elegantiam cum sapientia devincire. Quapropter tantam es gloriam consecutus, ut non solùm ætatis nostræ, quin etiam veterum temporum elegantiores, foecundissimosque Oratores, severiores, maximosque Jureconsultos longè, latèque antecellis. Quis enim tam ineffabili, ac penè divina differendi facultate cum tua in dicendo gravi, & inaudita facundia est comparandus? Cujus ope dura, difficillima, inextricabilia, mollia, facillima, plana, ac usitata reddis.

Hinc

Hinc perspicuum est tantum te
Renati, aliorumque Philosopho-
rum lectione ceteros antecel-
sisse Oratores, quantum Rena-
us ipse Philosophis omnibus in-
genii acumine, ac diligentia præ-
fuit. Quibus de causis opere præ-
mium omnino judicavi, volumen
hoc, quantumcumque est, quod
certè maximum est, insigni tuo
nomine decorandum. Cæterum
cum Fratris filium excellenti in-
genio adolescentulum egregiis
omnibus disciplinis alacri stu-
dio imbuere coneris, ut optimi
Consilarii, atque integerrimi ge-
nitoris ejus eximiæ, singularesque
virtutes reviviscant, existiman-
lum duxi has Meditationes à cæ-
teris

reris Rēnati op̄eribus sejunctas in
lucem dare, ut faciliior, ac brevior
lectio videatur, sicque tenerum
adolescēntuli animum ad illas
evolvendas, legendasque faciliū
alliciat: Vale:

V I T Æ R E N A T I D E S - C A R T E S

BREVIS DESCRIPTIO.

ex lib. 1. de M. 4. c.

Renatus Des-Cartes Dominus de Perron, in Gallia, quam semper excelsa ingenia protulisse, nemo ignorat, illustri loco natus. Nam atrem habuit antiquissima nobilitate fulgentem, et postquam Limonii in Pictonibus diu privatus fuisset, tandem est ad supremæ Rhedonum Curie præsidis dignitatem erectus, ac vitæ annorum sæpe fato functus, dum noster in Belgio philosophatur. De Matre nihil nobis constat, nisi quod cuncta mariti conjux unicum ex ipso filium peperit.

Locus natalis ei contigit Haga Turonum, uronensis Provinciæ Oppidum, in Pictonum confinio situm. Cartesius ipse lib. 1. Epist. 46. ad Banutum de suo in Sveciam itinere, disertis addit verbis ubi natus sit.

Editus vero est in hunc mundum anno 1596. quamprimum per ætatem potuit animum ad studia applicuit, quorum incredibili semper amo flagravat; atque in Collegio Flexiano, ætatis ætate supra 17. consuetum curriculum laudabiliter

ter absolvit, versatus in disciplina Patrum Societatis Jesu, quos felici methodo docendi, haud paucos magistros antecellere, & iis fatentur, qui ordini parum cupiunt, & Cartesius grata mente agnovit, cujus rei fidem facit Epistola 90. libri secundae, & Epistola 113. libri primi.

Egressus è Doctorum schola, idem de se quod Socrates judicabat scire se nihil præter hoc ipsum, quod nihil sciret. Sic enim pauld post principium Dissertationis de methodo: simul ac (ait) illud studiorum curriculum absolvi, quo decurso mos est in eruditorum numerum cooptari, planè aliud cœpi cogitare; tot enim me dubiis, totque erroribus implicatum esse animadverti, ut omnes discendi conatus nihil aliud mihi profuisse judicarem, quàm quod ignorantiam meam magis, magisque detexissem.

In sequentes aliquot annos variis peregrinationibus per Galliam, Belgium, Germaniam, Daniam, Hungariam, & Italiam impendit; exercitus, urbes, aulasque exterorum Principum invisens, & varia hinc inde experimenta colligens; & castra quidem, Socratis exemplo, secutus est, non tam belli, aut vitæ militaris amore, quàm cupiditate artes, laboresque bellantium sciendi ductus: unde & oblatum sibi militum præfecturam, recusavit; & omni quo militavit tempore nullum stipendium accepit, præter unicum dublonem, ut vocant, quem in perpetuum militiæ suæ monumentum adservavit. Et ut cæteras actiones ipsius bellicas silentio præteream, Rupellæ expugnandæ

anno 28. liberam operam commodavit ; cuius profectò obfidii exemplum clarissimè docet, Ecclesiam neque ipsam bellum gerere debere, neque Regam, Principumque arma ad defendendam religionem sollicitare, aut munimentis pacta firmare, vel munimenta fœderibus custodire; vel piè vivendo, & salutarem veritatem amando, & fideliter, modestèque profitendo, Deum ad misericordiam, & magistratus ad favorem excitare.

Tanto autem libentiùs hìc Rupellana obfidionis mentionem facio, quanto est iustiùs agnoscere sapientiam Dei, qui inter strepitus belli Cartesio occasionem suppeditavit ea, quæ longo tempore, continuis meditationibus, inter arma nunquam ommissis, de certiore philosophandi, ac veritatem reperiendi ratione didicerat, non modò viris summis ore communicandi, sed & postea editis publicè scriptis propagandi. Accidit enim, durante ea obfisione, ut Cbandovius, vir genere, & doctrina nobilissimus, postquam in illustrissimo cœtu, in quo præter alios dignitate, ingenio, ac scientia præclararum rerum eminentes viros, adebant Cardinalis Barbarinus, Romani Pontificis Legatus, & Cardinalis Berullius, Oratorii Ordinis Pater, de novis Philosophiæ principiis disseruisset, omnium applausibus exciperetur, & amplissimis laudibus condecoraretur singulis ab auditoribus, præter unicum Renatum, qui interrogatus, quid sibi ista de disputatione videretur, Oratoris equidem laudavit sermonem, cætum autem modestè reprehendit, quod probabilia pro certis, ac dubia

bia pro indubiis admisisset, se enim paratum ad quamlibet veritatem duodecim argumentis verisimilibus oppugnandum. Id cum haud parum admirarentur, quasi vere ex ipso, num quis igitur extet certus vitandorum sophismatum, certique ab incerto discernendi modus: & affirmantem, unamquamque veritatem mathematica evidentia secundum principia sua demonstrari posse, vehementer orarunt, ut publici ea juris faceret; quod & promisit.

Itaque post in Belgium secessit, studiis unice vacaturus, atque in ista litterarum bonarum patria diversis vicibus Amstelodamum, Daventriam, aliaque loca incoluit; maximam vero ætatis reliqua partem in Villa Egmontana transegit, ubi & philosophica, & mathematica opera, suo singula tempore in lucem emisit.

Fatum & Scriptori, & scriptis contigit, quale ferunt res humana, quæ ad divinas accederent, nisi læta tristibus, grata, ingratis, & contraria contrariis temperarentur. Quidam enim Philosophiam Cartesii tam sunt mirati vehementer, & amplexi cupide, quàm facere possunt, qui demersam in puteo veritatem eruisse putant, eventum omnino dissimili Pyrrhonianæ doctrinæ sorti, de qua Laërtius in præmio, ea vero, quæ Pyrrhonia dicitur, propter obscuritatem à plurimis repudiatur. Alii ex adverso libros hominis flamma dignos esse pronunciarunt, & authorem Scepticis, & impiis annumerarunt, atque ex humana societate, insigni supplicio, ejiciendum esse censuerunt. Nobis haud

haud volupe est, si vè infesta contentionis historiam amplius enarrare, si vè de capitibus accusationis, & quaestionibus controversis iudicium ferre, quorum utrumque, & ab instituto, & ab ingenio, & ab animo, & à munere nostro est alienum: quamquam istud profiteri minimè vereamur: errasse interdum humana conditione Cartesium, & errores excogitatis, ac speciosè declaratis philosophematis interdum defendisse; impietatem verò, & supremi Numinis contemptum nequaquam docuisse.

Primum enim ferè erat adversum doctrinæ seculi, Cartesiique genus, quod is laboraret, veritatem primis ex principiis eruere, à simplicibus, & facilioribus, ad composita, & difficiliora, naturali ordine progrediendo. Amabant contrà Academia problematice disputationibus exercere ingenia. Hac verò summa philosophandi diversitas necessariò debuit, cum docentium, tum discipulorum collidere studia, & contentiones excitare scholasticas, quæ denique in rixas, & odia abirent; de qua re, & ipse testatur lib. 2. Epistola 60. ad Mersennum.

Cartesio præsertim inimici fuere Patres Societatis Jesu, atque ut tantò facerent ægrius illa parte vulnus infligere studuerunt, qua fore acerbissimum callidè ominabantur. Erat namque Renatus Ecclesiæ Romanæ sic satis studiosus, ut se controversiis de Religione agitati immiscere borveret, omnemque hæreseos suspensionem anxie evitaret. Ignatiani contra philosophum accusare im-

pie-


pietatis, seu hostem Catholica Ecclesia, & proditorem mysteriorum ejus, voce, & scriptis traducere. Cartesio dederat natura ingenium severum, mores graves, usu postea, & studio confirmatos: Lapla virum facere ridiculum, refellere ludendo, dogmata ejus, & inventa physica, & mathematica ridendo, negando, vel carpendo. Amabat Renatus quietem, pacem, & otium tranquillum, ut suis liberius incumberet meditationibus, & inventionibus. Patres reverendi ipsum laceessere ad praelia, provocare in arenam; quapropter Renatus animum à tota Societate alienavit, cujus se unum, vel alterum membrum, humanitatis officii, coluit, fecisse reor, ut nè ab omnibus oppugnaretur. De universo certè ordine scribit lib. 2. Epistola 49. ad Mersennum.

Porro cur inter Doctores impietatis Renatum nequeam referre, plures ipsius philosophia suppeditat rationes; nam & Dei infinitam supra creatas res excellentiam, & immensam erga illas bonitatem diligentissime inculcat, qua contemplatione, mens recta non potest non ad supremi Numinis timorem, cultum, & amorem veluti blanda quadam vi perducì; tantùm abest, ut Deum esse dubitarit, aut veritatis indagatores dubitare jussit, audiamus ipsum ex V. Meditatione. Quod autem, ait, ad Deum attinet, certè, nisi præjudiciis obruerer, & rerum sensibilibus imagines, cogitationem meam omni ex parte obsiderent, nihil illo prius, aut facilius agnoscerem: nam quid ex se est apertius, quàm summum ens esse, sive Deum,

Deum, ad cuius solius essentiam, existentia pertinet existere? Quin omnem, cùm præsens, tùm futura vitæ lætitiâ in sola Dei optimi maximi contemplatione posuit. Detestantur id pia maxime, & jucunda ejus verba, quæ in fine Meditationis III. observari possunt. Causarum verd secundarum virtutem operandi omnem, dum ex sola causa prima derivat, à qua omni momento pendeant, nonne de potenti, sancta, & libera benignissimi Creatoris providentia concionatur?

Verùm nolumus hisce diutius immorari, atque progrediamur ad reliqua. Tandem voto Christianæ Serenissimæ Svecorum Reginae, quam vastum ingenium omnia, quæ in mundo essent, fierentque, experiri jubebat, etsi aliquandiu repugnasset, infaustum itineris exitum veritus Stokholmiâ concessit, Reginam philosophicis præceptis imbuturus. Mox cùm tunc corpus frigidum Septentrionis aërem haud ferret, nudato nihilominus capite, per totam ferè noctem, coram decumbente Regina, de propositis questionibus differere suetus, in morbum incidit, quo inflammatis pulmonibus, & vena sinè fructu scissa, septimo die obiit anno præteriti seculi 50. vitæ autem 56. Corpore erat pusillo, vultu blando, animo recto, ingenii, iudicii que vi incredibili, ad abscondita quævis erudienda pari, laboris indefessi; Vitam vivebat innocentem, & quatenus per adversarios licebat quietem: proVectior ætate, studiosius meditabatur, ac libros legebat, quos cœmere multorum more parum amabat:

bat: unde Alcmaria ab amico rogatus, Bibliothecam ipsi ostenderet suam, si quam haberet, dissectam ei vitulum monstrans, en! meam, agebat, Bibliothecam. Atque hoc est curriculum Vitæ Renati Des-Cartes, viri supra invidiam magni, quousque ejus historiam colligere licuit.



SYNOPSIS

SEX SEQUENTIUM

MEDITATIONUM.

IN prima causæ exponuntur, propter quas de rebus omnibus, præsertim materialibus, possumus dubitare; quamdiu scilicet non habemus alia scientiarum fundamenta, quàm ea, quæ antebac habuimus. Etsi autem istius tantæ dubitationis utilitas prima fronte non appareat, est tamen in eo maxima, quod ab omnibus præjudiciis nos liberet, viamque facillimam sternat ad mentem à sensibus abducendam; ac denique efficiat, ut de iis, quæ postea veræ esse comperieramus, non ampliùs dubitare possimus.

In secunda, mens quæ propria libertate utens, supponit ea omnia non existere, de quorum existentia vel minimè potest dubitare, animadvertit fieri non posse, quin ipsa interim existat. Quod etiam summæ est utilitatis; quoniam hoc pacto facile distinguit quanam ad se, hoc est ad naturam intellectualem, & quanam ad corpus pertineant. Sed quia fortè nonnulli rationes de animæ immortalitate illo in loco expectabunt, eos hic monendos puto, me conatum esse nihil scribere, quod non accuratè demonstrarem; ideoque non aliun-

A

ordi.

ordinem sequi potuisse, quàm illum, qui est apud Geometras usitatus; ut nempe omnia præmitterem, ex quibus quæsitæ propositio dependet, antequam de ipsa quidquam concluderem. Primum autem, & præcipuum, quod prærequiritur ad cognoscendam animæ immortalitatem, esse ut quàm maxime perspicuum de ea conceptum, & ab omni conceptu corporis planè distinctum formemus; quod ibi factum est. Præterea verò requiri etiam ut sciamus ea omnia, quæ clarè, & distinctè intelligimus, eo ipso modo, quo illa intelligimus esse verà: quod ante quartam meditationem probari non potuit; & habendum esse distinctum naturæ corporeæ conceptum, qui partim in ipsa secunda, partim etiam in quinta, & sexta formatur; atque ex his debere concludi, ea omnia, quæ clarè, & distinctè concipiuntur ut substantiæ diversæ, sicuti concipiuntur mens, & corpus, esse revera substantias realiter à se mutuo distinctas; hocque in sexta concludi: idemque etiam in ipsa confirmari, ex eo quod nullum corpus, nisi divisibile intelligamus, contra autem nullam mentem, nisi indivisibilem: neque enim possumus ullius mentis mediam partem concipere, ut possumus cujuslibet, quantumvis exigui, corporis; aded ut eorum naturæ, non modò diversæ, sed etiam quodammodò contrariæ agnoscantur. Non autem ulterius ea de re in hoc scripto me egisse; tum quia hæc sufficiunt ad ostendendum ex corporis corruptione, mentis interitum non sequi, atque sic ad alterius vitæ spem mortalibus faciendam;

dam; tum etiam quia præmissa, ex quibus ipsa mentis immortalitas concludi potest, ex totius Physicæ explicatione dependent: primò ut sciatur omnes omnino substantias, sive res, quæ à Deo creari debent ut existant, ex natura sua esse incorruptibiles, nec posse unquam desinere esse, nisi ab eodem Deo concursum suam jis denegante ad nihilum reducantur; ac deinde ut advertatur corpus quidem, in genere sumptum, esse substantiam, deoque nunquam etiam perire; sed corpus humanum, quatenus à reliquis differt corporibus, non nisi ex certa membrorum configuratione, aliisque ejusmodi accidentibus esse conflatum; mentem verd humanam, non ita ex ullis accidentibus constare, sed puram esse substantiam; etsi enim omnia ejus accidentia mutantur, ut quoddam alias res intelligat, alias velit, alias sentiat, &c. non idcirco ipsa mens alia evadit: humanum autem corpus aliud fit ex hoc solo, quoddam figura quarundam ejus partium mutetur: ex quibus sequitur corpus quidem perfacile interire, mentem autem ex natura sua esse immortalem.

In tertia Meditatione meum præcipuum argumentum ad probandam Dei existentiam satis fuisse, ut mihi videtur, explicui. Verumtamen, quia, ut Lectorum animos quàm maximè à sensibus abducerem, nullis ibi comparationibus à rebus corporeis petitis volui uti; multæ fortasse obscuritates remanserunt, sed quæ, ut spero, postea in responsionibus ad objectiones planè tollentur; ut in-

4 S Y N O P S I S.

ter ceteras, quomodo idea entis summè perfecti, quæ in nobis est, tantum habeat realitatis objectivæ, ut non possit non esse à causa summè perfectæ, quæd ibi illustratur, comparatione machinæ valdè perfectæ, cujus idea est in mente alicujus artificis; ut enim artificium objectivum hujus ideæ debet habere aliquam causam, nempe scientiam hujus artificis, vel alicujus alterius, à quo illam accepit, ita idea Dei, quæ in nobis est, non potest non habere Deum ipsum pro causa.

In quarta probatur ea omnia, quæ clarè, & distinctè percipimus, esse vera, simulque in quo ratio falsitatis consistat explicatur: quæ necessariò sciri debent, tam ad præcedentia firmanda, quàm ad reliqua intelligenda. Sed ibi interim est advertendum nullo modo agi de peccato, vel errore, qui committitur in persecutione boni & mali, sed de eo tantùm, qui contingit in dijudicatione veri & falsi. Nec ea spectari, quæ ad fidem pertinent, vel ad vitam agendam, sed tantùm speculativas, & solius luminis naturalis ope cognitæ veritates.

In quinta, præterquàm quod natura corporea in genere sumpta explicatur, nova etiam ratione Dei existentia demonstratur: sed in qua rursus nonnullæ fortè occurrent difficultates, quæ postea in responsione ad objectiones solventur: ac denique ostenditur, quo pacto verum sit ipsarum Geometricarum demonstrationum certitudinem à cognitione Dei pendere.

In

S Y N O P S I S.

§

*In sexta denique intellectio ab imaginatione
secernitur; distinctionum signa describuntur: men-
tem realiter à corpore distingui, probatur: eandem
nihilominus tam arctè illi esse conjunctam, ut
unum quid cum ipso componat, ostenditur; omnes
errores, qui à sensibus oriri solent, recensentur;
modi quibus vitari possint, exponuntur; & deni-
que rationes omnes, ex quibus rerum materialium
existentia possit concludi, afferuntur; non quod
eas valdè utiles esse putarim ad probandum id
ipsum, quod probant, nempe revera esse aliquem
mundum, & homines habere corpora, & similia,
de quibus nemo unquam sanæ mentis serid dubi-
tavit; sed quia illas considerando agnoscitur non
esse tam firmas, nec tam perspicuas, quàm sunt ea,
per quas in mentis nostræ, & Dei cognitionem de-
venimus; aded ut hæ sint omnium certissimæ, &
evidentissimæ, quæ ab humano ingenio sciri pos-
sint. Cujus unius rei probationem in his medita-
tionibus mihi pro scopo proposui. Nec idcirco hæc
recenseo varias alias quæstiones, de quibus etiam
in ipsis ex occasione tractatur.*



MEDITATIONUM⁷

De Prima

PHILOSOPHIA,

In quibus

Dei existentia, & animæ à corpore
distinctio demonstrantur,

P R I M A.

De iis, quæ in dubium revocari possunt.



Nimadverti jam ante aliquot annos, quàm multa, ineunte ætate, falsa pro veris admiserim, & quàm dubia sint quæcunque istis postea superextruxi, ac proinde funditùs omnia semel in vitâ esse evertenda, atque à primis fundamentis denuò inchoandum, si quid aliquando firmum, & mansurum cupiam in scientiis stabilire; sed ingens opus esse videbatur, eamque ætatem expectabam, quæ foret tam matura, ut capescendis disciplinis aptior nulla sequeretur. Quare tamdiu cunctatus sum, ut deinceps essem

A 4

in

in culpâ, si quod temporis superest ad agendum, deliberando consumerem. Opportunè igitur hodie mentem curis omnibus exsolvi, securum mihi otium procuravi, solus secedo, seriò tandem & liberè generali huic mearum opinionum everfioni vacabo. Ad hoc autem non erit necesse, ut omnes esse falsas ostendam, quòd nunquam fortassis assequi possem; sed quia jam ratio persuadet, non minus accuratè ab iis, quæ non planè certa sunt, atque indubitata, quàm ab apertè falsis assensionem esse cohibendam, satis erit ad omnes rejiciendas, si aliquam rationem dubitandi in unaquaque reperero. Nec ideo etiam singulæ erunt percurrentæ; quòd operis esset infiniti: sed quia suffossis fundamentis, quidquid iis superædificatum est, spontè collabitur, aggrediar statim ipsa principia, quibus illud omne quòd olim credidi nitebatur. Nempe quidquid hæctenus ut maximè verum admisi, vel à sensibus, vel per sensus accepi; hos autem interdum fallere deprehendi; ac prudentiæ est nunquam illis planè confidere, qui nos vel semel deceperunt. Sed fortè quàmvis interdum sensus circa minuta quædam, & remotiora nos fallant, pleraque tamen alia sunt, de quibus dubitari planè non potest, quàmvis ab iisdem hauriantur; ut jam me hic esse, foco assidere, hyemali togâ esse indutum, chartam istam manibus contrectare, & similia; mantus verò has ipsas, totumque hoc corpus meum esse, quâ ratione posset negari? nisi me fortè

fortè comparem nescio quibus insanis , quorum cerebella, tam contumax vapor ex atrâ bile labefaciat , ut constanter asseverent vel se esse reges, cùm sunt pauperrimi, vel purpurâ indutos, cùm sunt nudi, vel caput habere fictile, vel se totos esset cucurbitas, vel ex vitro conflatos ; sed amentes sunt isti , nec minùs ipse demens viderer , si quòd ab iis exemplum ad me transferrem . Præclarè sanè , tanquam non sim homo , qui soleam noctu dormire , & eadem omnia in somnis pati, vel etiam interdum minùs verisimilia, quàm quæ isti vigilantes: quàm frequenter verò usitata ista, me hic esse, togâ vestiri , foco assidere , quies nocturna persuadet? cùm tamen, positis vestibus, jaceo inter strata ; atqui nunc certè , vigilantibus oculis , intueor hanc chartam , non sopitum est hoc caput, quòd commoveo , manum istam prudens, & sciens extendo, & sentio non tam distincta contingerent dormienti: quasi scilicet non recorder à similibus etiam cogitationibus me aliàs in somnis fuisse delusum : quæ dum cogito attentius, tam planè video nunquam, certis indiciis, vigiliam à somno posse distinguere , ut obtusescam , & ferè hic ipse stupor mihi opinionem somni confirmet . Age ergò somniemus , nec particularia ista vera sint, nos oculos aperire, caput movere , mantis extendere , nec fortè etiam nos habere tales mantis , nec tale totum corpus; tamen profectò fatendum est visa per quietem esse veluti quasdam pictas imagines, quæ non nisi
si ad

fi ad similitudinem rerum verarum fingi potuerunt ; ideoque saltem generalia hæc, oculos, caput, manus, totumque corpus, res quasdam non imaginarias, sed veras existere : nam sanè pictores ipsi, nè tum quidem, cùm Sirenas, & Satyricos, maximè inusitatis formis, fingere student, naturas omni ex parte novas jis possunt assignare, sed tantummodo diversorum animalium membra permiscent ; vel si fortè aliquid excogitent adeò novum, ut nihil omnino ei simile fuerit visum, atque ita planè fictitium sit, & falsum ; certè tamen ad minimum veri colores esse debent, ex quibus illud componant : nec dispari ratione, quamvis etiam generalia hæc, oculi, caput, manus, & similia imaginaria esse possent, necessariò tamen saltem alia quædam adhuc magis simplicia, & universalia vera esse fatendum est, ex quibus, tanquam coloribus veris, omnes istæ seu veræ, seu falsæ ; quæ in cogitatione nostrâ sunt, rerum imagines effinguntur. Cujus generis esse videntur natura corporea in communi, ejusque extensio ; item figura rerum extensarum, item quantitas, sive earundem magnitudo, & numerus : item locus, in quò existant, tempusque, per quod durent & similia. Quapropter ex his forsàn non malè concludemus, Physicam, Astronomiam, Medicinam ; disciplinasque alias omnes, quæ à rerum compositarum consideratione dependent, dubias quidem esse ; atqui Arithmeticam, Geometriam, aliasque ejusmodi, quæ nonnisi de sim-
pli-

plicissimis & maximè generalibus rebus tractant, atque utrum eæ sint in rerum naturâ, nec ne, parum curant, aliquid certi, atque indubitati continere: nam sive vigilem, sive dormiam, duo, & tria simul junctâ sunt quinque, quadratumque non plura habet latera, quàm quatuor; nec fieri posse videtur, ut tam perspicuæ veritates in suspicionem falsitatis incurrant. Verumtamen infixâ quædam est meæ menti vetus opinio, Deum esse, qui potest omnia, & à quo talis, qualis existo, sum creatus: unde autem scio illum non fecisse, ut nulla planè sit terra, nullum cælum, nulla res extensa, nulla figura, nulla magnitudo, nullus locus; & tamen hæc omnia, non aliter, quàm nunc mihi videantur existere? imò etiam quemadmodum judico interdum alios errare circa ea, quæ se perfectissimè scire arbitrantur; ita ego, ut fallar, quoties duo, & tria simul addo, vel numero quadrati latera, vel si quid aliud faciliùs fingi potest? At fortè noluit Deus ita me decipi, dicitur enim summè bonus; sed si hoc ejus bonitati repugnaret talem me creasse, ut semper fallar; ab eadem etiam videretur esse alienum permittere, ut interdum fallar; quod ultimum tamen non potest dici. Essent verò fortasse nonnulli, qui tam potentem aliquem Deum mallent negare, quàm res alias omnes credere esse incertas: sed jis non repugnemus, totumque hoc de Deo demus esse fictitium; at seu fatò, seu continuatâ rerum serie, seu quovis alio modo me ad id quod sum pervenisse

hisse supponant; quoniam falli & errare imperfectio quædam esse videtur, quo minùs potèntem originis meæ auctorem assignabunt, eò probabiliùs erit me tam imperfectum esse, ut semper fallar: quibus sanè argumentis non habeo, quòd respondeam, sed tandem cogor fateri nihil esse ex his, quæ olim vera putabam, de quo non liceat dubitare, idque non per inconsiderantiam, vel levitatem, sed propter validas, & meditata rationes; ideoque etiam ab hisdem, non minus, quàm ab apertè falsis accuratè deinceps assensionem esse cohibendam, si quid certi velim invenire. Sed nondum sufficit hæc advertisse, curandum est, ut recorder; assiduè enim recurrunt consuetæ opinioniones, occupantque credulitatem meam, tanquam longo usu, & familiaritatis jure sibi devinctam, ferè etiam me invito; nec unquam his assentiri, & confidere desuescam, quamdiu tales esse supponam, quales sunt revèra, nempe aliquo quidem modo dubias, ut jamjam ostensum est, sed nihilominus valdè probabiles, & quas multò magis rationi consentaneum sit credere, quàm negare. Quapropter, ut opinor, non malè agam, si voluntate planè in contrarium versà me ipsum fallam, illasque aliquandiu omnino falsas, imaginariasque esse fingam, donec tandem velut æquatis utrimque præjudiciorum ponderibus, nulla amplius prava consuetudo judicium meum à rectà rerum perceptione detorqueat. Etenim scio nihil inde periculi, vel erroris interim sequuturum,

rum, & me plus æquo diffidentiae indulgere non posse, quandoquidem nunc, non rebus agendis, sed cognoscendis tantum incumbo. Supponam igitur non optimum Deum fontem veritatis, sed genium aliquem malignum, eundemque summe potentem, & callidum, omnem suam industriam in eo posuisse, ut me falleret; putabo cælum, aërem, terram, colores, figuras, sonos, cunctaque externa nihil aliud esse, quam ludificationes somniorum, quibus insidias credulitati meae tetendit; considerabo me ipsum tanquam manus non habentem, non oculos, non carnem, non sanguinem, non aliquem sensum, sed hæc omnia me habere falso opinantem: manebo obstinate in hac meditatione defixus, atque ita siquidem non in potestate meâ sit aliquid veri cognoscere, at certe hoc, quod in me est nè falsis assentiar; nec mihi quidquam iste deceptor, quantumvis potens, quantumvis callidus, possit imponere, obfirmatâ mente cavebo. Sed laboriosum est hoc institutum, & desidia quædam ad consuetudinem vitæ me reducit, nec aliter quàm captivus, qui fortè imaginaria libertate fruebatur in somnis, quum postea suspicari incipit se dormire, timet excitari, blandisque illusionibus lentè connivet: sic sponte relabor in veteres opiniones, vereorque expergisci, nè placidæ quieti laboriosa vigilia succedens non in aliqua luce, sed inter inextricabiles jam motarum difficultatum tenebras, in posterum sit degenda.

M E-

MEDITATIO II.

*De natura mentis humanæ: quodd ipsa
sit notior, quàm corpus.*

IN tantas dubitationes hesternâ meditatione
conjectus sum, ut nequeam amplius earum
oblivisci, nec videam tamen quâ ratione solven-
dæ sint, sed tanquam in profundum gurgitem ex
improvviso delapsus ita turbatus sum, ut nec pos-
sim in imo pedem figere, nec enatare ad summum.
Enitar tamen, & tentabo rursus eandem viam,
quam heri fueram ingressus, removendo scilicet
illud omne, quod vel minimum dubitationis ad-
mittit, nihilo secius, quàm si omnino falsum esse
comperissem; pergamque porro, donec aliquid
certi, vel si nihil aliud, saltem hoc ipsum pro cer-
to, nihil esse certi, cognoscam. Nihil nisi pun-
ctum petebat Archimedes, quod esset firmum, &
immobile, ut integram terram loco dimoveret;
magna quoque speranda sunt, si vel minimum
quid invenero, quodd certum sit, & inconcussum.
Suppono igitur omnia, quæ video falsa esse, cre-
do nihil unquam extitisse eorum, quæ mendax
memoria repræsentat, nullos planè habeo sensus;
corpus, figura, extensio, motus, locusque sunt
chimæræ; quid igitur erit verum? fortassis hoc
unum, nihil esse certi, Sed unde scio nihil esse
diversum ab his omnibus, quæ jamjam recensui,
de

de quo nè minima quidem occasio sit dubitandi? Nunquid est aliquis Deus, vel quocunque nomine illum vocem, qui mihi has ipsas cogitationes immittit? quare verò hoc putem, cum forsan ipsemet illarum author esse possim? Nunquid ergo saltem ego aliquid sum? sed jam negavi me habere ullos sensus, & ullum corpus; hæreo tamen: nam quid inde? sumne ita corpori, sensibusque alligatus, ut sinè illis esse non possim? sed mihi persuasi, nihil planè esse in mūdo, nullum cælum, nullam terram, nullas mentes, nulla corpora; nonne igitur etiam me non esse? imo certè ego eram si quid mihi persuasi: sed est deceptor nescio quis, summè potens, summè callidus, qui de industriâ me semper fallit; haud dubiè igitur ego etiam sum, si me fallit; & fallat quantum potest, nunquam tamen efficiet, ut nihil sim quamdiu me aliquid esse cogitabo; adeo ut omnibus satis superque pensitatis, denique statuendum sit hoc pronunciatum, Ego sum, ego existo, quoties à me profertur, vel mente concipitur, necessariò esse verum. Nondum verò satis intelligo, quisnam sim ego ille, qui jam necessariò sum; deincepsque cavendum est, nè fortè quid aliud imprudenter assumam in locum mei, sicque aberrem etiam in ea cognitione, quam omnium certissimam, evidentissimamque esse contendo. Quare jam de-nuo meditabor, quidnam me olim esse crediderim, priusquam in has cogitationes incidissem; ex quo deinde subducam quidquid allatis ratio-nibus

nibus vel minimùm potuit infirmari; ut ita tandem præcisè remaneat illud tantùm, quod certum est, & inconcussum. Quidnam igitur antehac me esse putavi? hominem scilicet; sed quid est homo? dicamne animal rationale? non, quia postea quærendum foret quidnam animal sit, & quid rationale, atque ita ex unâ quæstione in plures, difficiliorefque delaberer: nec jam mihi tantum otii est, ut ipso velim inter ejusmodi subtilitates abuti. Sed hîc potius attendam quid spontè, & naturâ duce cogitationi meæ antehac occurrebat, quoties quid essem considerabam: nempe occurrebat primò me habere vultum, manus, brachia, totamque hanc membrorum machinam, qualis etiam in cadavere cernitur, & quam corporis nomine designabam; occurrebat præterea me nutrirî, incedere, sentire, & cogitare; quas quidem actiones ad animam referebam; sed quid esset hæc anima, vel non advertebam, vel exiguum nescio quid imaginabar instar venti, vel ignis, vel ætheris, quod crassioribus mei partibus esset infusum: de corpore verò nè dubitabam quidem, sed distinctè me nosse arbitrabar ejus naturam, quam si fortè, qualem mente concipiebam, describere tentâssem, sic explicuisssem: per corpus intelligo illud omne, quod aptum est figurâ aliquâ terminari, loco circumscribi, spatium sic replere, ut ex eo aliud omne corpus excludat, tactu, visu, auditu, gustu, vel odoratu percipi, nec non moveri pluribus modis, non quidem à seipso

seipſo, ſed ab alio quopiam, à quo tangatur; nam, quæ habere vim ſeipſum movendi, item ſentien- di, vel cogitandi, nullo pacto ad naturam corpo- ris pertinere judicabam; quinimò mirabar potiùs tales facultates in quibuſdam corporibus reperi- ri. Quid autem nunc ubi ſuppono deceptorem aliquem potentiſſimum, & ſi fas eſt dicere, mali- gnum, datâ operâ in omnibus, quantum potuit, me deluſiſſe, poſſumne affirmare me habere, vel minimum quid ex iis omnibus, quæ jam dixi ad naturam corporis pertinere? attendo, cogito, re- volto, nihil occurrit, fatigor eadem fruſtrâ repe- tere. Quid verò ex iis, quæ animæ tribuebam, nutriri, vel incedere? quandoquidem jam corpus non habeo, hæc quoque nihil ſunt, niſi figmenta; ſentire? nempe etiam hoc non fit ſinè corpore; & permulta ſentire viſus ſum in ſomnis, quæ dein- de animadverti me non ſenſiſſe: cogitare? hîc in- venio, cogitatio eſt, hæc ſola à me divelli nequit, ego ſum, ego exiſto, certum eſt. Quamdiù au- tem? nempe quamdiù cogito; nam fortè etiam fieri poſſet, ſi ceſſarem ab omni cogitatione, ut il- licò totus eſſe deſinerem: nihil nunc admitto, niſi quodd neceſſariò ſit verum: ſum igitur præciſè tantum res cogitans, id eſt, mens, ſivè animus, ſi- vè intellectus, ſivè ratio, voces mihi priùs ſigni- ficationis ignotæ: ſum autem res verâ, & verè exiſtens, ſed qualis res? dixi, cogitans. Quid præterea? imaginabor: non ſum compages illa membrorum, quæ corpus humanum appellatur;

B

non

non sum etiam tenuis aliquis aër istis membris infusus, non ventus, non ignis, non vapor, non halitus, non quidquid mihi fingo; supposui enim ista nihil esse, manet positio, nihilominus tamen ego aliquid sum. Fortassis verò contingit, ut hæc ipsa, quæ suppono nihil esse, quia mihi sunt ignota, tamen in rei veritate non differant ab eo me, quem novi? nescio, de hac re jam non disputo, de iis tantum, quæ mihi nota sunt iudicium ferre possum: novi me existere, quæro quis sim ego ille, quem novi: certissimum est huius sic præcisè sumpti notitiam, non pendere ab iis, quæ existere nondum novi; non igitur ab iis ullis, quæ imaginatione effingo. Atque hoc verbum, *effingo*, admonet me erroris mei: nam fingerem reverà, si quid me esse imaginarer; quia nihil aliud est imaginari, quam rei corporeæ figuram, seu imaginem contemplari; jam autem certò scio me esse, simulque fieri posse, ut omnes istæ imagines, & generaliter quæcumq; ad corporis naturam referuntur, nihil sint, præter insomnias; quibus animadversis, non minus ineptire videor dicendo, imaginabor, ut distinctius agnoscam quisnam sim, quam si dicerem, jam quidem sum experrectus, videoque nonnihil veri; sed quia nondum video satis evidenter, datâ operâ obdormiam, ut hoc ipsum mihi somnia veriùs, evidentiùsque repræsentent. Itaque cognosco, nihil eorum, quæ possum imaginationis ope comprehendere, ad hanc, quam de me

me habeo notitiam, pertinere, mentemque ab illis diligentissimè esse avocandam, ut suam ipsa naturam, quàm distinctissimè percipiat. Sed quid igitur sum? res cogitans; quid est hoc? nempe dubitans, intelligens, affirmans, negans, volens, nolens, imaginans quoque, & sentiens. Non pauca sanè hæc sunt, si cuncta ad me pertineant, sed quidni pertinerent? nonne ego ipse sum, qui jam dubito ferè de omnibus, qui nonnihil tamen intelligo, qui hoc unum verum esse affirmo, nego cætera, cupio plura nosse, nolo decipi, multa vel invitus imaginor, multa etiam tanquàm à sensibus venientia animadverto. Quid est horum, quamvis semper dormiam, quamvis etiam is, qui me creavit, quantum in se est, me deludat, quòd non æquè verum sit, ac me esse? quid est, quòd à meà cogitatione distinguatur? quid est, quod à me ipso separatum dici possit? Nam quod ego sim, qui dubitem, qui intelligam, qui velim, tam manifestum est, ut nihil occurrat, per quod evidentius explicetur: sed verò etiam ego idem sum, qui imaginor, nam quamvis fortè, ut supposui, nulla prorsus res imaginata vera sit, vis tamen ipsa imaginandi reverà existit, & cogitationis meæ partem facit: idem denique ego sum, qui sentio, sive qui res corporeas, tanquam per sensus animadverto. Videlicet jam lucem video, strepitum audio, calorem sentio; falsa hæc sunt, dormio enim. At certè videre videor, audire, calefcere, hoc falsum esse non potest, hoc est propriè, quod in me

sentire appellatur ; atque hoc præcisè sic sumptum, nihil aliud est, quàm cogitare . Ex quibus equidem aliquantò meliùs incipio nosse quisnam sim; sed adhuc tamen videtur , nec possum abstinere quin putem , res corporeas , quarum imagines cogitatione formantur, & quas ipsi sensus explorant , multò distinctiùs agnosci , quàm istud nescio quid mei , quod sub imaginationem non venit ; quanquam profectò sit mirum, res , quas animadverto esse dubias, ignotas, à me alienas, distinctiùs, quàm quòd verum est, quòd cognitum, quàm denique me ipsum à me comprehendi : sed video quid sit , gaudet aberrare mens mea , nec dum se patitur intra veritatis limites cohiberi .

Esto igitur , & adhuc semel laxissimas habenas ei permittamus , ut illis paulò post opportunè reductis, faciliùs se regi patiatur . Consideremus res illas, quæ vulgò putantur omnium distinctissimè comprehendi ; corpora scilicet , quæ tangimus, quæ videmus, non quidem corpora in communi, generales enim istæ perceptiones aliquantò magis confusæ esse solent, sed unum in particulari ; sumamus exempli causâ hanc ceram; nuperrimè ex favis fuiteducta , nondum amisit omnem saporem sui mellis', nonnihil retinet odoris florum, ex quibus collecta est; ejus color, figura, magnitudo, manifesta sunt ; dura est, frigida est, faciliè tangitur , ac si articulo ferias, emittit sonum; omnia denique illi adsunt, quæ requiri videntur , ut corpus aliquod possit , quàm distincti-

Etissimè cognosci. Sed ecce, dum loquor, igni
 admovetur, saporis reliquiæ purgantur, odor ex-
 pirat, color mutatur, figura tollitur, crescit ma-
 gnitudo, fit liquida, fit calida, vix tangi potest,
 nec jam si pulses emittet sonum: remanetne
 adhuc eadem cera? remanere fatendum est, nemo
 negat, nemo aliter putat. Quid erat igitur in eâ,
 quod tam distinctè comprehendebatur? certè ni-
 hil eorum, quæ sensibus attingebam; nam quæ-
 cunque sub gustum, vel odoratum, vel visum, vel
 tactum, vel auditum veniebant, mutata jam sunt,
 remanet cera. Fortassis illud erat, quod nunc co-
 gito, nempe ceram ipsam, non quidem fuisse
 istam dulcedinem mellis, nec florum fragrantiam,
 nec istam albedinem, nec figuram, nec sonum,
 sed corpus, quod mihi apparebat paulò antè mo-
 dis istis conspicuum, nunc diversis: quid est au-
 tem hoc præcisè, quod sic imaginor? attendamus,
 & remotis iis, quæ ad ceram non pertinent, vi-
 deamus quid supersit, nempe nihil aliud, quàm
 extensum quid, flexibile, mutabile. Quid verò
 est hoc flexibile, mutabile? an quod imaginor
 hanc ceram ex figurâ rotundâ in quadratam, vel
 ex hac in triangularem verti posse? nullo modo,
 nam innumerabilium ejusmodi mutationum ca-
 pacem eam esse comprehendo, nec possum tamen
 innumerabiles imaginando percurrere: nec igi-
 tur comprehensio hæc ab imaginandi facultate
 perficitur. Quid extensum? nunquid etiam ipsa
 ejus extensio est ignota? nam in cerâ liquecente

fit major, major in ferventi, majorque rursus si calor augeatur: nec rectè judicarem quid sit cera, nisi putarèm hanc etiam plures secundùm extēſionem varietates admittere, quàm fuerim unquam imaginando complexus: superest igitur, ut concedam, me nè quidem imaginari quid sit hæc cera, sed solà mente percipere: dico hanc in particulari; de cerà enim in cōmuni clariùs est. Quænam verò est hæc cera, quæ non nisi mente percipitur; nempe eadē quam video, quam tango, quam imaginor, eadē denique, quam ab initio esse arbitrabar: atqui, quòd notandum est, ejus perceptio, non visio, non tactio, non imaginatio est, nec unquam fuit, quamvis priùs ita videretur, sed solius mentis inspectio, quæ vel imperfecta esse potest, & confusa; ut priùs erat, vel clara, & distincta, ut nunc est, prout minus, vel magis ad illà, ex quibus constat, attendo. Miror verò interim, quàm prona sit mea mens in errores; nam quamvis hæc apud me tacitus, & sinè vocē considerem, hæreo tamen in verbis ipsis; & ferè decipior ab ipso usu loquēdi: dicimus enim nos videre ceram ipsammet si adsit, non ex colore, vel figurà eam adesse judicare; unde concluderem statim; ceram ergo visione oculi, non solius mentis inspectione cognosci, nisi jam fortè respexissem ex fenestrà homines in plateà transeuntes, quos etiam ipsos non minus usitatè, quàm ceram dico me videre: quid autem video præter pilos, & vestes; sub quibus latere possent auto-

mata

mata, sed judico homines esse : atque ita id quod putabam me videre oculis, solâ judicandi facultate, quæ in mente meâ est, comprehendo. Sed pudeat suprâ vulgus sapere cupientem ex formis loquendi, quas vulgus invenit dubitationem quæsisisse, pergamusque deinceps, attendendo utrum ergo perfectiùs, evidentiùsque percipiebam quid esset cera, cùm primùm alpexi, credidique me illam ipso sensu externo, vel saltem sensu communi, ut vocant, id est potentiâ imaginatrice cognoscere; an verò potius nunc, postquam diligentius investigavi, tum quid ea sit, tum quomodò cognoscatur : certè hac de re dubitare esset ineptum; nam quid fuit in primâ perceptione distinctum? quid quod non à quovis animali haberi posse videretur? at verò cùm ceram ab externis formis distinguo, & tanquam vestibus detractis nudam considero, sic illam reverà, quamvis adhuc error in judicio meo esse possit, non possum tamen finè humanâ mentè percipere. Quid autem dicam de hac ipsâ mentè, sive de me ipso, nihildum enim aliud admitto in me esse, præter mentem, quid, inquam, ego qui hanc ceram videor tam distinctè percipere, nunquid me ipsum non tantùm multò veriùs, multò certiùs, sed etiam multò distinctiùs, evidentiùsque cognosco? nam si judico ceram existere ex eo, quòd hanc videam, certè multò evidentiùs efficitur me ipsum etiam existere ex eo ipso, quòd hanc videam : fieri enim potest, ut hoc, quod video, non

verè sit cera, fieri potest, ut nè quidem oculos habeam, quibus quidquam videatur; sed fieri planè non potest cum videam, sive (quòd jam non distinguo) cum cogitem me videre, ut ego ipse cogitans non aliquid sim: simili ratione si iudico ceram esse ex eo, quòd hanc tangam, idem rursus efficietur, videlicet me esse: si ex eo, quòd imaginer, vel quavis alià ex causà, idem planè: Sed & hoc ipsum, quod de cerà animadverto, ad reliqua omnia, quæ sunt extra me posita, licet applicare. Porro autem si magis distincta visa sit ceræ perceptio, postquam mihi non ex solo visu, vel tactu, sed pluribus ex causis innotuit, quantò distinctius me ipsum à me tunc cognosci fatendum est, quandoquidem nullæ rationes, vel ad ceræ, vel ad cuiuspiam alterius corporis perceptionem possint juvare, quin eadem omnes mentis meæ naturam melius probent? Sed & alia insuper tam multa sunt in ipsâ mente, ex quibus ejus notitia distinctior reddi potest, ut ea quæ ex corpore ad illam emanant, vix numeranda videantur. Atque ecce tandè m spontè sum reversus eò, quò volebam; nam cum mihi nunc notum sit ipsamet corpora non propriè à sensibus, vel ab imaginandi facultate, sed à solo intellectu percipi, nec ex eo percipi, quòd tangantur; aut videantur, sed tantum ex eo, quòd intelligantur, apertè cognosco nihil facilius, aut evidentius meâ mente posse à me percipi. Sed quia tam citò deponi veteris opinionis consuetudo non potest,

test, placet hîc consistere, ut altius hæc nova cognitio memoriæ meæ, diuturnitate meditationis, infigatur.

M E D I T A T I O III.

De Deo, quod existat.

Claudam nunc oculos, aures obturabo, avocabo omnes sensus, imagines etiam rerum corporalium omnes, vel ex cogitatione meâ delebo, vel certè, quia hoc fieri vix potest, illas ut inanes, & falsas nihili pendam, meque solum alloquendo, & penitus inspiciendo, meipsum paulatim mihi magis notum, & familiarem reddere conabor. Ego sum res cogitans, id est dubitans, affirmans, negans, pauca intelligens, multa ignorans, volens, nolens, imaginans etiam, & sentiens; ut enim antè animadverti, quamvis illa quæ sentio, vel imaginor extra me fortasse nihil sint, illos tamen cogitandi modos, quos sensus, & imaginationes appello, quatenus cogitandi quidam modi tantùm sunt, in me esse sum certus. Atque his paucis omnia recensui, quæ verè scio, vel saltem; quæ me scire hæcenus adverti. Nunc circumspiciam diligentius, an fortè adhuc apud me alia sint, ad quæ nondum respexi: sum certus me esse rem cogitantem, nunquid ergo etiam scio quid requiratur, ut de aliquâ re sim certus? nempè in hac primâ cognitione nihil aliud

aliud est , quàm clara quædam , & distincta perceptio ejus quòd affirmo ; quæ sanè non sufficeret ad me certum de rei Veritate reddendum , si posset unquam contingere , ut aliquid quòd ita clarè , & distinctè perciperem falsum esset ; ac proindè jam videor pro regulâ generali posse statuerè , illud omne esse verum , quod valdè clarè , & distinctè percipio . Verumtamen multa priùs , ut omninò certa , & manifesta admisi , quæ tamen postea dubia esse deprehendi : qualia ergo ista fuerè ? nempè terra , cœlum , sidera , & cætera omnia , quæ sensibus usurpabam ; quid autem de illis clarè percipiebam ? nempè talium rerum ideas , si ve cõgitationis menti meæ obversari ; sed ne nunc quidem illas ideas in me esse inficio . Aliud autem quiddam erat , quod affirmabam , quodque etiam ob consuetudinem credendi clarè me percipere arbitrabar , quod tamen reverà non percipiebam , nempè res quasdam extra me esse , à quibus ideæ istæ procedebant , & quibus omninò similes erant ; atque hoc erat , in quo vel fallebar , vel certè si verum judicabam , id non ex vi meæ perceptionis contingebat . Quid verò cùm circa res Arithmeticas , vel Geometricas aliquid valdè simplex , & facilè considerabam , ut quod duo , & tria simul juncta sint quinque , vel similia , nunquid saltem illa satis perspicuè intuebar , ut vera esse affirmarem ? Equidem non aliam ob causam de iis dubitandum esse postea judicavi , quàm quia veniebat in mentem fortè aliquem Deum talem

talem mihi naturam indere potuisse, ut etiam circa illa deciperer, quæ manifestissima videntur? sed quoties hæc præconcepta de summâ Dei potentiâ opinio mihi occurrit, non possum non fateri, siquidem velit, facile illi esse efficere, ut errem, etiam in iis, quæ me puto mentis oculis quàm evidentissimè intueri; quoties verò ad ipsas res, quas valdè clarè percipere arbitror me convertō, tam planè ab illis persuadeor, ut spontè erumpam in has voces, fallat me quisquis potest, nunquam tamen efficiet, ut nihil sim, quamdiù aliquid esse cogitabo, vel ut aliquando verum sit me nunquam fuisse, cùm jam verum sit me esse; vel fortè etiam ut duo, & tria simul juncta plura, vel pauciora sint quàm quinque, vel similia, in quibus scilicet repugnantiam agnosco manifestam. Et certè cùm nullam occasionem habeam existimandi aliquem Deum esse deceptorem, nec quidem adhuc satis sciam, utrum sit aliquis Deus, valdè tenuis, &, ut ita loquar, Metaphysica dubitandi ratio est, quæ tantùm ex eâ opinione dependet. Ut autem etiam illa tollatur, quamprimum occurreret occasio, examinare debeo an sit Deus, & si sit, an possit esse deceptor; hac enim re ignoratâ, non videor de ullâ aliâ planè certus esse unquam posse. Nunc autem ordo videtur exigere, ut prius omnes meas cogitationes in certa genera distribuam, & in quibusnam ex illis veritas, aut fallitas propriè consistat; inquiram. Quædam ex his tanquam rerum imagines sunt, qui-

quibus solis propriè convenit ideæ nomen, ut cum Hominem, vel Chimæram, vel Cælum, vel Angelum, vel Deum cogito; aliæ verò alias quasdam præterea formas habent, ut cum volo, cum timeo, cum affirmo, cum nego, semper quidem aliquam rem ut subjectum meæ cogitationis apprehendo, sed aliquid etiam ampliùs, quàm istius rei similitudinem cogitatione complector; & ex his aliæ voluntates, sive affectus, aliæ autem judicia appellantur. Jam quòd ad ideas attinet, si solæ in se spectentur, nec ad aliud quid illas referam, falsæ propriè esse non possunt; nam si ve capram, si ve chimæram imaginer, non minùs verum est me unam imaginari, quàm alteram. Nulla etiam in ipsa voluntate, vel affectibus falsitas est timenda, nam quamvis prava, quamvis etiam ea, quæ nusquam sunt, possim optare, non tamen ideò non verum est illa me optare, ac proindè sola supersunt judicia, in quibus mihi cavendum est nè fallar; præcipuus autem error, & frequentissimus, qui possit in illis reperiri, consistit in eo, quòd ideas, quæ in me sunt, iudicem rebus quibusdam extra me positis, similes esse, si ve conformes: nam profectò si tantùm ideas ipsas, ut cogitationis meæ quosdam modos considerarem, nec ad quidquam aliud referrem, vix mihi ullam errandi materiam dare possent. Ex his autem ideis aliæ innatæ, aliæ adventitiæ, aliæ à me ipso factæ mihi videntur: nam quòd intelligam quid sit res, quid sit veritas, quid sit cogitatio, hæc

hæc non aliundè habere videor,quàm ab ipsamet
meâ naturâ ; quodd autem nunc strepitum au-
diam , solem videam , ignem sentiam , à rebus
quibusdam extra me positis procedere hætenus
judicavi: ac denique Sirenes, Hippogryphes , &
similia à me ipso finguntur : vel fortè etiam om-
nesesse adventitias possum putare,vel omnes in-
natas, vel omnes factas, nondum enim veram il-
larum originem clarè perspexi. Sed hîc præcipuè
de iis est quærendum, quas tanquam à rebus ex-
tra me existentibus desumtas considero, quænam
me moveat ratio , ut illas istis rebus similes esse
existimem ; nempè ita videor doctus à naturâ, &
præterea experior illas non à meâ voluntate, nec
proindè à me ipso pendere , sæpè enim vel invito
obversantur , ut jam , sive velim,sive nolim, sen-
tio calorem,& ideò puto sensum illum,sive ideam
caloris à re à me diversâ, nempè ab ignis, cui assi-
deo, calore mihi advenire,nihilque magis obvium
est, quàm ut judicem istam rem suam similitudi-
nem potiùs, quàm aliud quid in me immittere ;
quæ rationes an satis firmæ sint,jam videbo.Cùm
hîc dico me ita doctum esse à naturâ , intelligo
tantùm spontaneo quodam impetu me ferri ad
hoc credendum, non lumine aliquo naturali mi-
hi ostendi esse verum , quæ duo multùm discre-
pant ; nam quæcumque lumine naturali mihi
ostenduntur, (ut quod ex eo quod dubitem se-
quatur me esse, & similia) nullo modo dubia ef-
se possunt, quia nulla alia facultas esse potest,cui
æquè

æquè fidam, ac lumini isti, quæque illa non vera esse possit docere; sed quantum ad impetus naturales, jam sæpè olim judicavi me ab illis in deteriore partem fuisse impulsus, cum de bono eligendo ageretur; nec video cur iisdem in ullâ aliâ re magis fidam. Deindè quamvis ideæ illæ à voluntate meâ non pendeant, non idè constat ipsas à rebus extra me positis necessariò procedere, ut enim impetus illi, de quibus mox loquebar, quamvis in me sint, à voluntate tamen meâ diversi esse videntur; ita fortè etiam aliqua alia est in me facultas, nondum mihi satis cognita, istarum idearum effectrix, ut hæcenus semper visum est illas, dum somnio, absque ullâ rerum exter-
narum ope in me formari. Ac denique quamvis à rebus à me diversis procederent, non indè sequitur illas rebus istis similes esse debere; quini-
mo in multis sæpè magnum discrimen videor deprehendisse. Sic, exempli causa, duas diversas solis ideas apud me invenio, unam tanquam à sensibus haustam, & quæ maximè inter illas, quas adventitias existimo, est recensenda, per quâ mihi valdè parvus apparet; aliam verò ex rationibus Astronomiæ desumptam, hoc est ex notionibus quibusdam mihi innatis elicitam, vel quocunque alio modo à me factam, per quam aliquoties major, quàm terra exhibetur; utraque profectò similis eidem soli extra me existenti esse non potest, & ratio persuadet illam ei maximè esse dissimilem, quæ quàm proximè ab ipso videtur emanasse.

nâsse. Quæ omnia satis demonstrant me non hætenus ex certo iudicio, sed tantum ex cæco aliquo impulsu credidisse res quasdam à me diversas existere, quæ ideas, sive imagines suas per organa sensuum, vel quolibet alio pacto mihi immitant. Sed alia quædam adhuc via mihi occurrit ad inquirendum, an res aliquæ ex iis, quarum ideæ in me sunt, extra me existant. Nempè quatenus ideæ istæ, cogitandi quidam modi tantum sunt, non agnosco ullam inter ipsas inæqualitatem, & omnes à me eodem modo procedere videntur; sed quatenus una unam rem, alia aliam repræsentat, patet easdem esse ab invicem yaldè diversas; nam proculdubio illæ, quæ substantias mihi exhibent, majus aliquid sunt, atque, ut ita loquar, plus realitatis objectivæ in se continent, quàm illæ, quæ tantum modos, sive accidentia repræsentant; & rursus illa per quam summum aliquem Deum æternum, infinitum, omniscium, omnipotentem, rerumque omnium, quæ præter ipsum sunt, creatorem intelligo, plus profectò realitatis objectivæ in se habet, quàm illæ per quas finitæ substantiæ exhibentur. Jam verò lumine naturali manifestum est tantumdem ad minimum esse debere in causâ efficiente, & totali, quantum in ejusdem causæ effectu: nam quæso undenam posset assumere realitatem suam effectus, nisi à causa? & quomodo illam ei causâ dare posset, nisi etiam haberet? Hinc autem sequitur nec posse aliquid à nihilo fieri, nec etiam id quod magis per-

perfectum est, hoc est, quod plus realitatis in se continet, ab eo quod minus: atque hoc non modò perspicuè verum est de iis effectibus, quorum realitas est actualis, sive formalis; sed etiam de ideis, in quibus consideratur tantùm realitas objectiva; hoc est, non modò non potest, exempli causa, aliquis lapis, qui priùs non fuit, nunc incipere esse, nisi producat ab aliquâ re, in quâ totum illud sit vel formaliter, vel eminenter, quod ponitur in lapide; nec potest calor in subiectum, quod priùs non calebat induci, nisi à re, quæ sit ordinis saltem æquè perfecti, atque est calor, & sic de cæteris; sed præterea etiam non potest in me esse idea caloris, vel lapidis, nisi in me posita sit ab aliquâ causâ, in quâ tantundem ad minimum sit realitatis, quantum esse in calore, vel lapide concipio: nam quamvis ista causa nihil de suâ realitate actuali, sive formali in meam ideam transfundat, non ideo putandum est illam minus realem esse debere, sed talem esse naturam ipsius ideæ, ut nullam aliam ex se realitatem formalem exigat, præter illam, quam mutuatur à cogitatione meâ, cujusest modus; quòd autem hæc idea realitatem objectivam hanc vel illam contineat potius, quàm aliam, hoc profectò habere debet ab aliquâ causâ, in quâ tantundem sit ad minimum realitatis formalis, quantum ipsa continet objectivæ; si enim ponamus aliquid in ideâ reperiri, quod non fuerit in ejus causâ, hoc igitur habet à nihilo; atqui quantumvis imperfectus sit
iste

iste essendi modus, quo res est objectivè in intellectu per ideam, non tamen profectò planè nihil est, nec proinde à nihilo esse potest. Nec etiam debeo suspicari, cùm realitas, quam considero in meis ideis, sit tantùm objectiva, non opus esse ut eadem realitas sit formaliter in causis istarum idearum, sed sufficere si sit in iis etiam objectivè; nam quemadmodum iste modus essendi objectivus competit ideis ex ipsarum naturâ, ita modus essendi formalis competit idearum causis, saltèm primis, & præcipuis, ex earum naturâ: & quamvis fortè una idea ex aliâ nasci possit, non tamen hîc datur progressus in infinitum, sed tandem ad aliquam primam debet deveniri, cujus causa sit instar archetypi, in quo omnis realitas formaliter contineatur, quæ est in ideâ tantùm objectivè; adeò ut lumine naturali mihi sit perspicuum ideas in me esse veluti quasdam imagines, quæ possunt quidem facilè deficere à perfectione rerum, à quibus sunt desumptæ, non autem quicquam majus, aut perfectius continere. Atque hæc omnia quò diutius, & curiosius examino, tantò clariùs, & distinctius vera esse cognosco; sed quid tandem ex his concludam? nempe si realitas objectiva alicujus ex meis ideis sit tanta, ut certus sim eandem nec formaliter, nec eminenter in me esse, nec proinde me ipsum ejus ideæ causam esse posse, hinc necessariò sequi, non me solum esse in mundo, sed aliquam aliam rem, quæ istius ideæ est causa, etiam existere; si

C

verò

verò nulla talis in me idea reperiatur, nullum planè habeo argumentum, quod me de alicujus rei à me diversæ existentia certum reddat; omnia enim diligentissimè circumspexi, & nullum aliud potui hætenus reperire. Ex his autem meis ideis, præter illam, quæ me ipsum mihi exhibet, de quâ hîc nulla difficultas esse potest, alia est, quæ Deum, aliæ, quæ res corporeas, & inanimes, aliæ, quæ Angelos, aliæ, quæ animalia, ac denique aliæ, quæ alios homines mei similes repræsentant. Et quantum ad ideas, quæ alios homines, vel animalia, vel Angelos exhibent, facilè intelligo, illas ex iis, quas habeo mei ipsius, & rerum corporalium, & Dei posse componi, quamvis nulli, præter me, homines, nec animalia, nec Angeli in mundo essent. Quantum autem ad ideas rerum corporalium, nihil in illis occurrit, quod sit tantum, ut nō videatur à me ipso potuisse proficisci; nam si penitus inspiciam, & singulas examinem eo modo, quo heri examinavi ideam ceræ, animadverto perpauca tantum esse, quæ in illis clare, & distinctè percipio, nempe magnitudinem, sive extensionem in longum, latum, & profundum; figuram, quæ ex terminatione istius extensionis exurgit, situm quem diversa figurata inter se obtinent, & motum, sive mutationem istius situs; quibus addi possunt substantia, duratio, & numerus: cætera autem, ut lumen, & colores, soni, odores, saponi, calor, & frigus, aliæque tactiles qualitates, non nisi valdè confusè, & obscurè à me

me cogitantur ; adeò ut etiam ignorem, an sint veræ, vel falsæ, hoc est an ideæ, quas de illis habeo, sint rerum quarundam ideæ, an non rerum : quamvis enim falsitatem propriè dictam, sive formalem, nonnisi in judiciis posse reperiri paulò antè notaverim, est tamen profectò quædam alia falsitas materialis in ideis, cum non rem tanquam rem repræsentant : ita, exempli causa, ideæ, quas habeo caloris, & frigoris, tam parum claræ, & distinctæ sunt, ut ab iis discere non possim, an frigus sit tantum privatio caloris, vel calor privatio frigoris, vel utrumque sit realis qualitas, vel neutrum ; & quia nullæ ideæ nisi tanquam rerum esse possunt, siquidem verum sit, frigus nihil aliud esse, quàm privationem caloris, ideæ, quæ mihi illud tanquam reale quid, & positivum repræsentat, non immeritò falsa dicetur, & sic de cæteris. Quibus profectò non est necesse, ut aliquem auctorem à me diversum assignem, nam si quidem sint falsæ, hoc est nullas res repræsentent, lumine naturali notum mihi est illas à nihilo procedere, hoc est, non aliam ob causam in me esse, quàm quia deest aliquid naturæ meæ, nec est planè perfecta ; si autem sint veræ, quia tamen tam parum realitatis mihi exhibent, ut nè quidè illud à non re possim distinguere, non video cur à me ipso esse non possint. Ex iis verò, quæ in ideis rerum corporalium clara, & distincta sunt, quædam ab ideâ mei ipsius videor mutuari potuisse, nempe substantiam, durationem, numerum,

& si quæ alia sint ejusmodi ; nam cùm cogito lapidem esse substantiam , sive esse rem , quæ per se apta est existere , itemque me esse substantiam , quamvis concipiam me esse rem cogitantem , & non extensam ; lapidem verò esse rem extensam , & non cogitantem , ac proinde maxima inter utrumque conceptum sit diversitas , in ratione tamen substantiæ videntur convenire ; itemque , cùm percipio me nunc esse , & priùs etiam aliquamdiu fuisse recorder , cùmque varias ab eo cogitationes , quarum numerum intelligo , acquirō ideas durationis , & numeri , quas deinde ad quasque alias res possum transferre . Cætera autem omnia , ex quibus rerum corporearum ideæ constantur , nempe extensio , figura , situs , & motus , in me quidem , cùm nihil aliud sim , quàm res cogitans , formaliter non continentur ; sed quia sunt tantùm modi quidam substantiæ , ego autem substantia , videntur in me contineri posse eminenter . Itaque sola restat idea Dei , in quâ considerandum est , an aliquid sit , quòd à me ipso non potuerit proficisci . Dei nomine intelligo substantiam quandam infinitam , independentem , summè intelligentem , summè potentem , & à quâ tū ego ipse , tum aliud omne , si quid aliud extat , quodcumque extat est creatum . Quæ sanè omnia talia sunt , ut quò diligentius attendo , tantò minus à me solo profecta esse posse videantur . Ideoque , ex antedictis , Deum necessariò existere est concludendum : nam quamvis substantiæ quidē
idea

idea in me sit, ex hoc ipso, quod sim substantia, non tamen idcirco esset idea substantiæ infinitæ, cum sim finitus, nisi ab aliquâ substantiâ, quæ reverâ esset infinita, procederet. Nec putare debeo me non percipere infinitum per veram ideam, sed tantum per negationem finiti, ut percipio quietem, & tenebras per negationem motus, & lucis; nam contrâ manifestè intelligo plus realitatis esse in substantiâ infinitâ, quàm in finitâ, ac proinde priorem quodammodo in me esse perceptionem infiniti, quàm finiti, hoc est Dei, quàm mei ipsius: quâ enim ratione intelligerem me dubitare, me cupere, hoc est, aliquid mihi deesse, & me non esse omnino perfectum, si nulla idea entis perfectioris in me esset, ex cujus comparatione defectus meos agnoscerem? Nec dici potest hanc fortè ideam Dei materialiter falsam esse, ideoque à nihilo esse posse, ut paulò ante de ideis caloris, & frigoris, & similium animadverti; nam contrâ, cum maximè clara, & distincta sit, & plus realitatis objectivæ, quàm ulla alia contineat, nulla est per se magis vera, nec in quâ minor falsitatis suspicio reperiatur. Est, inquam, hæc idea entis summè perfecti, & infiniti, maximè vera; nam quamvis fortè fingi possit tale ens non existere, non tamen fingi potest ejus ideam nihil reale mihi exhibere, ut de ideâ frigoris antè dixi. Est etiam maximè clara, & distincta, nam quidquid clarè, & distinctè percipio, quod est reale, & verum, & quod perfectionem aliquam importat: to-

tum in eâ continetur: nec obstat, quòd non comprehendam infinitum, vel quòd alia innumera in Deo sint, quæ nec comprehendere, nec fortè etiam attingere cogitatione ullo modo possum; est enim de ratione infiniti, ut à me, qui sum finitus non comprehendatur; & sufficit me hoc ipsum intelligere, ac judicare illa omnia, quæ clarè percipio, & perfectionem aliquam importare scio, atque etiam fortè alia innumera, quæ ignoro, vel formaliter, vel eminenter in Deo esse, ut idea, quam de illo habeo sit omnium, quæ in me sunt, maximè vera, & maximè clara, & distincta. Sed fortè majus aliquid sum, quàm ipse intelligam, omnesque illæ perfectiones, quas Deo tribuo, potentiâ quodammodo in me sunt, etiamsi nondum sese exerant, neque ad actum reducuntur; experior enim jam cognitionem meam paulatim augeri; nec video, quid obstat, quò minus ita magis, & magis augeatur in infinitum, nec etiam cur, cognitione sic auctâ, non possim ejus ope reliquas omnes Dei perfectiones adipisci; nec denique cur potentia ad istas perfectiones, si jam in me est, non sufficiat ad illarum ideam producendam. Imò nihil horum esse potest, nam primò, ut verum sit cognitionem meam gradatim augeri; & multa in me esse potentiâ, quæ actu nondum sunt, nihil tamen horum ad ideam Dei pertinet, in quâ nempe nihil omnino est potentiale, namque hoc ipsum gradatim augeri, certissimum est imperfectionis argumentum. Præterea

rea etiam si cognitio mea semper magis, & magis augeatur, nihilominus intelligo nunquam illam idcirco fore actu infinitam, quia nunquam eò devenietur, ut majoris adhuc incrementi non sit capax. Deum autem ita judico esse actu infinitum, ut nihil ejus perfectioni addi possit. Ac denique percipio esse objectivum ideæ, non à solo esse potenciali, quòd propriè loquendo nihil est, sed tantummodo ab actuali, sive formali posse produci. Neque profectò quicquam est in his omnibus, quòd diligenter attendenti, non sit lumine naturali manifestum: sed quia cùm minus attendo, & rerum sensibilibus imagines mentis aciem excæcant, non ita facilè recordor, cur idea entis me perfectioris, necessariò ab ente aliquo procedat, quod sit reverà perfectiùs: ulterius quærere libet, an ego ipse habens illam ideam, esse possem si tale ens nullum existeret. Nempe à quo essem? à me scilicet, vel à parentibus, vel ab aliis quibuslibet Deo minus perfectis, nihil enim ipso perfectiùs, nec etià æquè perfectū cogitari, aut fingi potest. Atqui si à me essem, nec dubitarẽ nec optarem, nec omnino quicquam mihi deesset, omnes enim perfectiones, quarum idea aliqua in me est, mihi dedissem, atque ita ipsemet Deus essem: nec putare debeo illa forsàn, quæ mihi desunt, difficiliùs acquiri posse, quàm illa, quæ jam in me sunt: nam contrà, manifestum est longè difficiliùs fuisse me, hoc est rem, sive substantiam cogitantem, ex nihilo emergere, quàm multarum

rerum, quas ignoro cognitiones, quæ tantum istius substantiæ accidentia sunt, acquirere. At tertè si majus illud à me haberem, non mihi illa saltem, quæ facilius haberi possunt denegâsem: sed neque etiâ ulla alia ex iis, quæ in ideâ Dei contineri percipio; quia nempe nulla difficiliora factu mihi videntur: si quæ autem difficiliora factu essent, certè etiâ mihi difficiliora viderentur, siquidem reliqua, quæ habeo, à me haberem, quoniam in illis potentiam meam terminari experirer. Neque vim harum rationum effugio, si supponam me fortè semper fuisse, ut nunc sum, tanquam si inde sequeretur nullum existentiae meæ auctorem esse quærendum: quoniam enim omne tempus vitæ in partes innumeras dividi potest, quarum singulæ à reliquis, nullo modo dependent, ex eo quòd paulò ante fuerim, non sequitur me nunc debere esse, nisi aliqua causa me, quasi rursus creet ad hoc momentum, hoc est me conservet. Perspicuum enim est attendenti ad durationis naturâ, eadè planè vi, & actione opus esse ad rem quamlibet, singulis momentis, quibus durat, conservandam, quâ opus esset ad eandem de novo creandam, si nondum existeret, adeo ut conservationem, solâ ratione à creatione differre, sit etiâ unum ex iis, quæ lumine naturali manifesta sunt. Itaque debeo nunc interrogare me ipsum, an habeam aliquam vim, per quam possim efficere, ut ego ille, qui jam sum, paulò post etiam sim futurus: nam cum nihil aliud sim, quàm res
cogi-

cogitans, vel ſaltem, cùm de eâ tantùm mei parte præciſè nunc agam, quæ eſt res cogitans, ſi quæ tali viſ in me eſſet, ejus procul dubio conſcius eſſem ; ſed & nullam eſſe experior , & ex hoc ipſo evidentiffimè cognosco me ab aliquo ente à me diverſo pendere : fortè verò illud ens non eſt Deus, ſumque vel à parentibus productus, vel à quibuslibet aliis cauſis Deo minus perfectis . Imò , ut jam ante dixi , perſpicuum eſt, tantundem ad minimum eſſe debere in cauſâ, quantum eſt in effectu ; & idcirco , cùm ſim res cogitans , ideamque quandam Dei in me habens, qualiſcunque tandem mei cauſa aſſignetur, illam etiam eſſe rem cogitantem, & omnium perfectionum, quas Deo tribuo, ideam habere fatendum eſt ; poteſtque de illâ rurfus quæri an ſit à ſe, vel ab aliâ ; nam ſi à ſe , patet ex dictis illam ipſam Deum eſſe, quia nempe , cùm vim habeat per ſe exiſtendi , habet proculdubio etiam vim poſſidendi actu omnes perfectiones, quarum ideam in ſe habet, hoc eſt omnes quas in Deo eſſe concipio . Si autem ſit ab aliâ, rurfus eodem modo de hac alterâ quæretur an ſit à ſe , vel ab aliâ , donec tandem ad cauſam ultimam deveniatur , quæ erit Deus . Satis enim apertum eſt, nullum hîc dari poſſe progreſſum in infinitum , præſertim cùm non tantùm de cauſâ, quæ me olim produxit, hîc agam , ſed maximè etiam de illâ, quæ me tempore præſenti conſervat . Nec fingi poteſt plures fortè cauſas partiales ad me efficiendum concurriffe, &

ab

ab unâ, ideam unius ex perfectionibus, quas Deo tribuo, ab aliâ, ideam alterius, me accepisse, adeo ut omnes quidem illæ perfectiones alicubi in universo reperiantur, sed non omnes simul junctæ in uno aliquo, qui sit Deus; nam contrâ unitas, simplicitas, sivè inseparabilitas eorum omnium, quæ in Deo sunt, una est ex præcipuis perfectionibus, quas in eo esse intelligo; nec certè istius omnium ejus perfectionum, unitatis idea in me potuit poni ab ullâ causâ, à quâ etiam aliarum perfectionum ideas non habuerim; neque enim efficere potuit, ut illas simul junctas, & inseparabiles intelligerem, nisi simul effecerit, ut quænam illæ essent agnoscerem. Quantum denique ad parentes attinet, ut omnia vera sint, quæ de illis unquam putavi, non tamen profectò illi me conservant, nec etiam ullo modo me, quatenus sum res cogitans, effecerunt; sed tantùm dispositiones quasdam in eâ materiâ posuerunt, cui me, hoc est mentem (quam solam nunc pro me accipio) inesse judicavi: ac proinde hîc nulla de iis difficultas esse potest, sed omnino est concludendum ex hoc solo, quòd existam, quædamque idea entis perfectissimi, hoc est Dei, in me sit, evidentissimè demonstrari Deum etiam existere. Superest tantùm, ut examinem, quâ ratione ideam istam à Deo accepi; neque enim illam sensibus hausi, nec unquam non expectanti mihi advenit, ut solent rerum sensibilium ideæ, cùm istæ res, externis sensuum organis occurrunt, vel occurrere viden-

videntur ; nec etiam à me efficta est , nam nihil ab illâ detrachere, nihil illi superaddere planè possum, ac proinde superest, ut mihi sit innata, quæ admodum etiam mihi est innata idea mei ipsius . Et sanè non mirum est, Deum me creando, ideam illam mihi indidisse, ut esset tanquam nota artificis operi suo impressa; nec etiam opus est, ut nota illa sit aliqua res ab opere ipso diversa , sed ex hoc uno, quòd Deus me creavit , valdè credibile est , me quodammodo ad imaginem , & similitudinem ejus factum esse, illamque similitudinem , in quâ Dei idea continetur , à me percipi per eandem facultatem, per quam ego ipse à me percipior , hoc est , dum in meipsum mentis aciem converto , non modò intelligo me esse rem incòpletam, & ab alio dependentem, remque ad majora, & majora, sive meliora indefinitè aspirantem , sed simùl etiam intelligo illum , à quo pendeo , majora ista omnia non indefinitè , & potentiâ tantùm, sed reipsâ infinitè in se habere , atque ita Dum esse; totaque vis argumenti in eo est, quòd agnoscam fieri non posse ut existam talis naturæ, qualis sum, nempè ideam Dei in me habens , nisi reverà Deus etiam existeret, Deus, inquam, ille idem, cujus idea in me est, hoc est habens omnes illas perfectiones, quas ego non comprehendere, sed quocunque modo attingere cogitatione possum , & nullis planè defectibus obnoxius . Ex quibus satis patet illum fallacem esse non posse : omnem enim fraudem, & deceptionem à defectu aliquo

aliquo pendere, lumine naturali manifestum est .
 Sed priusquam hoc diligentius examinem, simul-
 que in alias veritates ; quæ inde colligi possunt,
 inquiram ; placet hîc aliquandiu in ipsius Dei
 cōtemplatione immorari, ejus attributa apud me
 expendere, & immensi hujus luminis pulchritu-
 dinem, quantùm caligantis ingenii mei acies fer-
 re poterit, intueri, admirari, adorare . Ut enim in
 hac solâ divinæ majestatis contemplatione sum-
 mam alterius vitæ felicitatem consistere fide
 credimus , ita etiam jam ex eadem, li-
 cèt multò minus perfecta, maxi-
 mam , cujus in hac vitâ ca-
 paces sumus, volupta-
 tem percipi pos-
 se experi-
 mur.



De Vero, & Falso.

ITa me his diebus assuefeci in mente à sensibus abducenda, tamque accuratè animadverti per pauca esse, quæ de rebus corporeis verè percipiuntur, multoque plura de mente humanâ, multò adhuc plura de Deo cognosci, ut jam absque ullâ difficultate cogitationem à rebus imaginabilibus ad intelligibiles tantùm, atque ab omni materiâ secretaſ convertam: & sanè multò magis distinctam habeo ideã mentis humanæ, quatenus est res cogitans, non extensa in longũ, latum, & profundum, nec aliud quid à corpore habens, quàm ideam ullius rei corporeæ: cumque attendo me dubitare, sive esse rem incompletam, & dependentem, adeò clara, & distincta idea entis independentis, & completi, hoc est Dei, mihi occurrit; & ex hoc uno, quòd talis idea in me sit, sive quòd ego ideam illam habens existam, adeo manifestè concludo Deum etiam existere, atque ab illo singulis momentis totam existentiam meam dependere, ut nihil evidentiùs, nihil certius ab humano ingenio cognosci posse confidam. Jamque videre videor aliquam viam, per quam ab istà contemplatione veri Dei, in quo nempe sunt omnes thesauri scientiarum, & sapientiæ absconditi, ad cæterarum rerum cognitionem deveniatur.

In

In primis enim agnosco fieri non posse ut ille me unquam fallat ; in omni enim fallaciâ , vel deceptione aliquid imperfectionis reperitur ; & quamvis posse fallere nonnullum esse videatur acuminis, aut potentie argumentum , proculdubio velle fallere, vel malitiam, vel imbecillitatem testatur, nec proinde in Deum cadit . Deinde experior quandam in me esse judicandi facultatē, quam certè, ut & reliqua omnia, quæ in me sunt, à Deo accepi ; cumque ille nolit me fallere, talem profectò non dedit, ut dum eâ rectè utor, possim unquam errare . Nec ullum de hac re dubium superesset, nisi indè sequi videretur, me igitur errare nunquam posse ; nam si quodcunque in me est, à Deo habeo , nec ullam ille mihi dederit errandi facultatem , non videor posse unquam errare . Atque ita prorsus quamdiu de Deo tantum cogito , totusque in eum me converto, nullam erroris, aut falsitatis causam deprehendo ; sed postmodum ad me reversus experior me tamen innumeris erroribus esse obnoxium , quorum causam inquirens, animadverto, nō tantum Dei, sive entis summè perfecti realem , & positivam, sed etiam, ut ita loquar, nihili, sive ejus , quod ab omni perfectione summè abest, negativam quandam ideam mihi obversari , & me tanquam medium quid inter Deum , & nihil , sive inter summum ens , & non ens ita esse constitutum , ut, quatenus à summo ente sum creatus, nihil quidem in me sit, per quod fallar, aut in errorem inducar,

ducas; sed quatenus etiam quodammodo de nihilo, sive de non ente participo, hoc est quatenus non sum ipse summus ens, defuntque mihi quamplurima, non adeo mirum esse quod fallar: atque ita certe intelligo errorem, quatenus error est, non esse quid reale, quod à Deo dependeat, sed tantummodo esse defectum, nec proinde ad errandum mihi opus esse aliquâ facultate in hunc finem à Deo tributâ, sed contingere ut errem, ex eo quod facultas verum judicandi, quam ab illo habeo, non sit in me infinita. Verumtamen hoc nondum omnino satisfacit, non enim error est pura negatio, sed privatio, sive carentia cujusdam cognitionis, quæ in me quodammodo esse deberet; atque attendenti ad Dei naturam, non videtur fieri posse, ut ille aliquam in me posuerit facultatem, quæ non sit in suo genere perfecta, sive quæ aliquâ sibi debitâ perfectione sit privata; nam si quod peritior est artifex, eò perfectiora opera ab illo proficiantur, quid potest à summo illo rerum omnium conditore factum esse, quod non sit omnibus numeris absolutum? nec dubium est, quin potuerit Deus me talem creare, ut nunquam fallerer; nec etiam dubium est, quin velit semper id quod est optimum; anne ergo melius est me falli; quam non falli? Dum hæc perpendo attentius, occurrit primò, non mihi esse mirandum si quædam à Deo fiant, quorum rationes non intelligam; nec de ejus existentia ideo esse dubitandum, quod fortè quædam alia esse experiar, quæ
quare,

quare, vel quomodo ab illo facta sint, non comprehendo; cum enim jam sciam naturam meam esse valde infirmam, & limitatam, Dei autem naturam esse immensam, incomprehensibilem, infinitam, ex hoc satis etiam scio innumerabilia illū posse, quorum causas ignorem; atque ob hanc unicam rationem, totum illud causarum genus, quod à fine peti solet, in rebus Physicis nullum usum habere existimo; non enim absque temeritate me puto posse investigare fines Dei. Occurrit etiam non unam aliquam creaturam separatim, sed omnem rerum universitatem esse spectandam, quoties an Opera Dei perfecta sint inquirimus: quod enim fortè, non immeritò, si solum esset, valde imperfectum videretur, ut habens in mundo rationem partis est perfectissimum; & quamvis ex quo de omnibus volui dubitare, nihil adhuc præter me, & Deum existere certò cognovi, non possum tamen, ex quo immensam Dei potentiam animadverti, negare, quin multa alia ab illo facta sint, vel saltē fieri possint, adeo ut ego rationem partis in rerum universitate obtineam. Deinde ad me propius accedens, & qualesnam sint errores mei (qui soli imperfectionem aliquā in me argvunt) investigans, adverto illos à duabus causis simul concurrentibus dependere, nempe à facultate cognoscendi, quæ in me est, & à facultate eligendi, sive ab arbitrii libertate, hoc est ab intellectu, & simul à voluntate; nam per solum intellectum, percipio tantum ideas de quibus

quibus iudicium ferre possum, nec ullus error propriè dictus, in eo præcisè sic spectato, reperitur; quamvis enim innumere fortasse res existant, quarum ideæ nullæ in me sunt, non tamen propriè illis privatus, sed negativè tantùm destitutus sum dicendus, quia nempe rationem nullam possum asserre, quâ probem Deum mihi maiore, quàm dederit cognoscendi facultatem dare debuisse; atque quantumvis peritum artificem esse intelligam, non tamen ideo puto illum in singulis ex suis operibus, omnes perfectiones ponere debuisse, quas in aliquibus ponere potest. Nec verò etiam queri possum, quòd non satis amplâ, & perfectam voluntatem, sive arbitrii libertatem à Deo acceperim; nam sanè nullis illam limitibus circumscribi experior. Et quòd valdè notandum mihi videtur, nulla alia in me sunt tam perfecta, aut tanta, quin intelligam perfectiora, sive majora adhuc esse posse; nam si, exempli causâ, facultatem intelligendi considero, statim agnosco perexiguam illam, & valde finitam in me esse, simulque alterius cuiusdam multò majoris, imò maximæ, atque infinitæ ideam formo, illamque hoc ipso, quod ejus ideam formare possim, ad Dei naturam pertinere percipio. Eadem ratione si facultatem recordandi, vel imaginandi, vel quaslibet alias examinem, nullam planè invenio, quam non in me tenuem, & circumscriptam, in Deo immensam esse intelligam, sola est voluntas, sive arbitrii libertas, quàm tantam in me

D

expe-

experiō, ut nullius majoris ideam apprehendam;
adeo ut illa præcipue sit, ratione cujus imaginē
quandam, & similitudinem Dei me referre in-
telligo; nam quamvis major, absque compara-
tione, in Deo, quàm in me sit, tùm ratione cogni-
tionis, & potentiae, quæ illi adjunctæ sunt, red-
duntque ipsam magis firmam, & efficacem; tùm
ratione objecti, quoniam ad plura se extendit; nō
tamen in se formaliter, & præisè spectata major
videtur, quia tantùm in eo consistit, quòd idem,
vel facere, vel non facere (hoc est affirmare, vel
negare, prosequi, vel fugere) possimus, vel potius
in eo tantùm, quòd ad id, quod nobis ab intelle-
ctu proponitur affirmandum, vel negandum,
sivè prosequendum, vel fugiendum, ita feramur,
ut à nullâ vi externâ nos ad id determinari sen-
tiamus. Neque enim opus est me in utramque
partem ferri posse, ut sim liber, sed cōtrâ, quò ma-
gis in unam propendeo, sivè quia rationem veri,
& boni in eâ evidenter intelligo, sivè quia Deus
intima cogitationis meæ ita disponit, tantò libe-
rius illam eligo; nec sanè divina grâtiâ, nec na-
turalis cognitio unquâ imminuunt libertatem,
sed potius augent, & corroborant. Indifferentia
autem illa, quâ experiō, cùm nulla me ratio in
unam partem magis, quàm in alteram impellit,
est infimus gradus libertatis, & nullâ in eâ per-
fectionem, sed tantummodò in cognitione defe-
ctum, sivè negationem quandam testatur; nam
si semper quid verum, & bonum sit, clarè vide-
rem,

rem, nunquam de eo, quòd esset iudicandum, vel eligendum deliberarem; atque ita, quamvis planè liber, nunquam tamen indifferens esse possem. Ex his autem percipio, nec vim volendi, quam à Deo habeo, per se spectatam, causam esse errorum meorum; est enim amplissima, atque in suo genere perfectissima; neque etiam vim intelligendi; nam quidquid intelligo, cum à Deo habeam, ut intelligam, procul dubio rectè intelligo, nec in eo fieri potest, ut fallar; unde ergo nascuntur mei errores? nempe ex hoc uno, quòd cum latius pateat voluntas, quàm intellectus, illam non intrà eosdem limites contineo, sed etiam ad illa, quæ non intelligo, extendo; ad quæ cum sit indifferens, facile à vero, & bono deflectit, atque ita & fallor, & pecco. Exempli causâ, cum examinarem hisce diebus, an aliquid in mundo existeret, atque adverterem ex hoc ipso, quòd illud examinarem, evidenter sequi me existere, non potui quidem non iudicare, illud, quod tam clarè intelligebam verum esse, non quòd ab aliquâ vi externâ fuero ad id coactus, sed quia ex magnâ luce in intellectu, magna consequuta est propensio in voluntate, atque ita tantò magis spontè, & liberè illud credidi, quantò minus fui ad istud ipsum indifferens. Nunc autem non tantum scio me, quatenus sum res quædam cogitans, existere, sed præterea etiam idea quædam naturæ corporeæ mihi obversatur, contingitque ut dubitem, an natura cogitans, quæ in me est, vel po-

tius, quæ ego ipse sum, alia sit ab istâ naturâ corporeâ, vel an ambæ idem sint; & suppono, nullam adhuc intellectui meo rationem occurrere, quæ mihi unum magis, quàm aliud persuadeat, certè ex hoc ipso sum indifferens ad utrumlibet affirmandum, vel negandum, vel etiam ad nihil de eâ re judicandum. Quinimo etiam hæc indifferencia, non ad ea tantùm se extendit, de quibus intellectus nihil planè cognoscit, sed generaliter ad omnia, quæ ab illo non satis perspicuè cognoscuntur, eo ipso tempore, quo de iis à voluntate deliberatur; quantumvis enim probabiles conjecturæ me trahant in unam partem, sola cognitio, quòd sint tantùm conjecturæ, non autem certæ, atque indubitabiles rationes, sufficit ad assensionem meam in contrarium impellendam: quod satis his diebus sum expertus, cùm illa omnia, quæ priùs, ut vera, quàm maximè credideram, propter hoc unum, quòd de iis aliquo modo posse dubitari deprehendissem, planè falsa esse supposui. Cùm autem quid verum sit, non satis clarè, & distinctè percipio, si quidem à judicio ferendo abstinenceam, clarum est me rectè agere, & non falli; sed si, vel affirmem, vel negem, tunc libertate arbitrii non rectè utor; atque si in eam partem, quæ falsa est, me convertam, planè fallor; si verò alteram amplectar, casu quidem incido in veritatem, sed non ideo culpâ carebo; quia lumine naturali manifestum est, perceptionem intellectus præcedere semper debere voluntatis deter-

determinationem ; atque in hoc liberi arbitrii non recto usu,privatio illa inest,quæ formam erroris constituit;privatio,inquã,inest in ipsâ operatione,quatenus à me procedit, sed non in facultate,quam à Deo accepi,nec etiam in operatione, quatenus ab illo dependet : neque enim habeo causam ullam conquerendi,quòd Deus mihi non maiorem vim intelligendi, sive non majus lumen naturale dederit,quàm dedit, quia est de ratione intellectus finiti,ut multa nō intelligat, & de ratione intellectus creati, ut sit finitus; estque quòd agam gratias illi, qui mihi nunquam quicquam debuit pro eo, quòd largitus est, non autem quòd putem me ab illo iis esse privatum, sive illum mihi ea abstulisse,quæ non dedit. Non habeo etiam causam conquerendi,quòd voluntatem dederit latius patentem, quàm intellectum, cùm enim voluntas in unâ tantùm re, & tanquã in indivisibili consistat, non videtur ferre ejus natura, ut quicquam ab illâ demi possit ; & sanè, quòd amplior est,tantò majores debeo gratias ejus datori. Nec denique etiã queri debeo, quòd Deus mecum concurrat ad eliciendos illos actus voluntatis, sive illa judicia,in quibus fallor : illi enim actus sunt omninò veri,& boni,quatenus à Deo dependent, & major in me quodãmodò perfectio est, quòd illos possim elicere, quàm si non possem;privatio autem,in quâ solà ratio formalis falsitatis, & culpæ consistit, nullo Dei concursu indiget, quia non est res, neque ad illum relata,

ut causam privatio, sed tantummodò negatio dici debet, nam sanè nulla imperfectio in Deo est, quòd mihi libertatem dederit assentiendi, vel nò assentiendi quibusdam, quorum claram, & distinctam perceptionem in intellectu meo non posuit, sed pròculdubio in me imperfectio est, quòd istà liberatè non benè utar, & de iis, quæ non rectè intelligo, iudicium feram. Video tamèn fieri à Deo facile potuisse, ut etiamsi manerem liber, & cognitionis finitæ, nunquam tamen errarem, nempe si vel intellectui meo claram, & distinctam perceptionem omnium, de quibus unquà essem deliberaturus, indidisset; vel tantùm si adeò firmiter memoriæ impressisset, de nullâ unquam re esse iudicandum, quam clarè, & distinctè non intelligerem, ut nunquam ejus possem oblivisci; & facile intèllego me, quatenus rationem habeo totius cuiusdam, perfectiorem futurum fuisse, quàm nunc sum, si talis à Deo factus essem. Sed non ideo possum negare, quin major, quodammodò perfectio sit in totà rerum universitate, quòd quædam ejus partes ab erroribus immunes non sint, aliæ verò sint, quàm si omnes planè similes essent, & nullum habeo jus conquerendi, quòd eam me Deus in mundo personam sustinere voluerit, quæ non est omnium præcipua, & maximè perfecta, ac præterea etiam, ut non possim ab erroribus abstinere; priori illo modo, qui pendet ab evidenti certum omnium perceptione, de quibus est deliberandum, possum tamèn illo altero, qui pen-

pendet ab eo tantum, quod recorder, quoties de
rei veritate non liquet, à judicio ferendo esse
abstinendum, nam quamvis eam in me infirmi-
tatem esse experiar, ut non possim semper uni, &
eidem cognitioni defixus inhærere, possum ta-
men attentâ, & sæpius iteratâ meditatione effice-
re, ut ejusdem, quoties usus exiget, recorder, at-
que ita habitum quendam non errandi acquirâ:
quâ in re cum maxima, & præcipua hominis per-
fectio consistat, non parum me hodiernâ medita-
tione lucratum esse existimo, quod erroris, &
falsitatis causam investigârim: & sanè nulla alia
esse potest ab eâ, quam expliciti; nam quoties vo-
luntatem in judiciis ferendis ita contineo, ut ad
ea tantum se extendat, quæ illi clarè, & distinctò
ab intellectu exhibentur, fieri planè non potest
ut errèm, quia omnis clara, & distincta perceptio,
proculdubio est aliquid, ac proinde à nihilo esse
non potest, sed necessario Deum auctorem habet,
Deum, inquam, illum summè perfectum, quem
fallacem esse repugnat; ideoque proculdubio est
vera: Ne hodie tantum didici, quid mihi sit
cavendum ut nunquam fallar, sed simul etiam,
quid agendum, ut assequar veritatem; assequar
enim illam profectò, si tantum ad omnia, quæ
perfectè intelligo satis attendam, atque illa à reli-
quis, quæ confusius, & obscurius apprehendo, se-
cernam. Cui rei diligenter imposterum operam
dabo.

MEDITATIO V.

*De Essentia rerum materialium, &
iterum de Deo quodd existat.*

Multa mihi supersunt de Dei attributis, multa de mei ipsius, sive mentis meæ naturâ investiganda: sed illa fortè aliàs resumam, iamque nihil magis urgere videtur (postquam animadverti, quid cavendum atque agendum sit ad assequendam veritatem) quàm ut ex dubiis, in quæ superioribus diebus incidi, coner emergere, videamque an aliquid certi de rebus materialibus haberi possit. Et quidem priusquam inquiram, an aliquæ tales res extra me existant, considerare debeo illarum ideas, quatenus sunt in meâ cogitatione, & videre quænam ex iis sint distinctæ, quænam confusæ. Nempe distinctè imaginor quantitatem, quam vulgò Philosophi appellant continuam, sive ejus quantitatis, aut potius rei quantæ extensionem in longum, latum, & profundum; numerò in eà varias partes; quaslibet istis partibus magnitudines, figuras, situs, & motus locales, motibusque istis quaslibet durationes assigno. Nec tantùm illa sic in genere spectata mihi planè nota, & perspecta sunt, sed præterea etiam particularia innumera de figuris, de numero, de motu, & similibus attendendo percipio, quorum veritas aded aperta est, & natura

turæ meæ consentanea , ut dum illa primùm de-
 tego , non tam videar aliquid novi addiscere ;
 quàm eorum , quæ iam ante sciebam, remini-
 sci , sive ad ea primùm advertere , quæ du-
 dum quidem in me erant , licet non prius in
 illa obtutum mentis convertissem . Quodque
 hîc maximè considerandum puto , invenio apud
 me innumeras ideas quarundam rerum, quæ
 etiamsi extra me fortasse nullibi existant , non
 tamen dici possunt nihil esse ; & quamvis à me
 quodammodo ad arbitrium cogitentur , non ta-
 men à me finguntur, sed suas habent veras, & im-
 mutabiles naturas: ut cùm, exempli causâ, trian-
 gulum imaginor, etsi fortasse talis figura nullibi
 gentium extrâ cogitationem meam existat , nec
 unquam extiterit, est tamen profectò determina-
 ta quædâ ejus natura, sive essentia, sive forma, im-
 mutabilis, & æterna, quæ à me non efficta est, nec
 à mente meâ dependet, ut patet ex eo , quod de-
 monstrari possint variæ proprietates de isto trian-
 gulo, nempe quod ejus tres anguli sint æquales
 duobus rectis ; quòd maximo ejus angulo, maxi-
 mum latus subtendatur, & similes, quas velim, no-
 lim clarè nunc agnosco , etiamsi de iis nullo mo-
 do antea cogitârim, cùm triangulum imaginatus
 sum, nec proinde à me fuerint effictæ. Neque ad
 rem attinet, si dicam, mihi fortè à rebus externis,
 per organa sensuum istam trianguli ideam adve-
 nisse; quia nempe corpora triangularem figuram
 habentia interdum vidi; possum enim alias innu-
 meras

meras figuras excogitare, de quibus nulla suspicio esse potest, quod mihi unquam per sensus illapsæ sint, & tamē varias de iis, non minus, quàm de triangulo, proprietates demonstrare; quæ sanè omnes sunt veræ, quandoquidem à me clarè cognoscuntur, ideoque aliquid sunt, non merum nihil: patet enim illud omne, quod verum est, esse aliquid: & jam fusè demonstravi illa omnia, quæ clarè cognosco esse vera; atque quamvis id non demonstrâssem, ea certè est natura mentis meæ, ut nihilominus non possem iis non assentiri, saltem quamdiu ea clarè percipio; meminique me semper, etiam ante hoc tempus, cum sensuum objectis, quàm maximè inhærerem, ejusmodi veritates, quæ nempe de figuris, aut numeris, aliisve ad Arithmeticam, vel Geometriam, vel ingenere ad puram atque abstractam Mathesim pertinentibus evidenter agnoscebam, pro omnium certissimis, habuisse. Jam verò si ex eo solo, quod alicujus rei ideam possim ex cogitatione meâ depromere, sequitur ea omnia, quæ ad illam rem pertinere clarè, & distinctè percipio, reverâ ad illam pertinere, nunquid inde haberi etiam potest argumentum, quo Dei existentia probetur? Certè ejus ideam, nempe entis summe perfecti, non minus apud me invenio, quàm ideam cujusvis figuræ, aut numeri; nec minus clarè, & distinctè intelligo ad ejus naturam pertinere, ut semper existat, quàm id quod de aliquâ figurâ aut numero demonstro ad ejus figuræ
aut

aut numeri naturam etiam pertinere; ac proinde, quamvis non omnia, quæ superioribus hisce diebus meditatus sum vera essent, in eodem ad minimum certitudinis gradu esse deberet apud me Dei existentia, in quo fuerunt hæcenus Mathematicæ veritates. Quanquàm sanè hoc primâ fronte non est omnino perspicuum, sed quandam sophismatis speciem refert. Cùm enim assuetus sim in omnibus aliis rebus existentiam ab essentiâ distinguere, facilè mihi persuadeo illam etiam ab essentiâ Dei sejungi posse, atque ita Deum, ut non existentem cogitari: sed tamen diligentius attendenti fit manifestum, non magis posse existentiam ab essentiâ Dei separari, quàm ab essentiâ trianguli magnitudinem trium ejus angulorum æqualium duobus rectis, sive ab ideâ montis ideam vallis: adeo ut non magis repugnet cogitare Deum (hoc est ens summè perfectum) cui desit existentia (hoc est cui desit aliqua perfectio) quàm cogitare montem cui desit vallis. Verùm tamen nè possim quidem cogitare Deum, nisi existentem, ut neque montem sinè valle: at certè, ut neque ex eo quod cogitem montem cum valle, ideo sequitur aliquem montem in mundo esse, ita neque ex eo quod cogitem Deum ut existentem, ideo sequi videtur Deum existere: nullam enim necessitatem cogitatio mea rebus imponit; & quemadmodum imaginari licet equum alatum, etsi nullus equus habeat alas, ita fortè Deo existentiam possum affingere, quamvis nullus
Deus

Deus existat. Imo sophisma hîc latet, neque enim ex eo, quod non possim cogitare montem nisi cum valle, sequitur alicubi montem, & vallē existere, sed tantum montem, & vallem, sive existant, sive non existant, à se mutuo sejungi non posse; atqui ex eo quod non possim cogitare Deum nisi existentem, sequitur existentiam à Deo esse inseparabilem, ac proinde illum reverā existere, non quod mea cogitatio hoc efficiat, sive aliquam necessitatem ulli rei imponat, sed contrā, quia ipsius rei, nempe existentiæ Dei necessitas me determinat ad hoc cogitandum: neque enim mihi liberum est Deum absque existentia (hoc est ens summè perfectum absque summâ perfectione) cogitare, ut liberum est, equum, vel cum alis, vel sinè alis imaginari. Neque etiam hîc dici debet, necesse quidem esse, ut ponam Desi existentem, postquam posui illi habere omnes perfectiones; quandoquidem existentia una est ex illis: sed priorem positionem necessariam non fuisse: ut neque necesse est me putare figuras omnes quadrilateras circulo inscribi; sed posito, quod hoc putem, necesse erit me fateri rhombum circulo inscribi, quod apertè tamen est falsum. Nam quamvis non necesse sit, ut incidam unquam in ullam de Deo cogitationem, quoties tamen de ente primo, & summo libet cogitare, atque ejus ideam tanquàm ex mentis meæ thesauro depromere, necesse est, ut illi omnes perfectiones attribuiam, etsi nec omnes tunc enumerem, nec

nec ad singulas attendam : quæ necessitas planè
 sufficit, ut postea, cum animadverto existentiam
 esse perfectionem, rectè concludam ens primum,
 & summum existere : quemadmodum non est
 necesse me ullum triangulum unquam imagina-
 ri, sed quoties volo figuram rectilineam tres tan-
 tum angulos habentem considerare, necesse est,
 ut illi ea tribuam, ex quibus rectè infertur ejus
 tres angulos non majores esse duobus rectis,
 etiamsi hoc ipsum tunc non advertā. Cum verò
 examino, quænam figuræ circulo inscribantur,
 nullo modo necesse est, ut putem omnes quadri-
 lateras ex eo numero esse; imò etiam id ipsum ne-
 quidem fingere possum, quandiu nihil volo ad-
 mittere, nisi quòd clarè, & distinctè intelligo: ac
 proinde magna differentia est inter ejusmodi fal-
 sas positiones, & ideas veras mihi ingenitas, qua-
 rum prima, & præcipua est idea Dei: nam sanè
 multis modis intelligo illam non esse quid ficti-
 tium à cogitatione meâ dependens, sed imagi-
 nem veræ, & immutabilis naturæ, ut primò, quia
 nulla alia res potest à me excogitari, ad cujus es-
 sentiam existentia pertineat, præter solū Deum;
 deinde quia non possum duos, aut plures ejusmo-
 di Deos intelligere; & quia posito, quòd jam
 unus existat, planè videam esse necessarium, ut,
 & ante ab æterno extiterit, & in æternum sit
 mansurus: ac denique, quòd multa alia in Deo
 percipiam, quorum nihil à me detrahi potest, nec
 mutari.

Sed

Sed verò quæcumque tandem utar probandæ ratione, semper eò res redit, ut ea me sola planè persuadeant, quæ clarè, & distinctè percipio. Et quidem ex iis, quæ ita percipio, etsi nonnulla unicuique obvia sint, alia verò nonnisi ab iis, qui propiis inspiciunt, & diligenter investigant, deteguntur; postquam tamen detecta sunt, hæc non minus certa, quàm illa existimantur. Ut quamvis non tam facile appareat in triangulo rectangulo quadratum basis æquale esse quadratis laterum, quàm istam basim maximo ejus angulo subtendi, non tamen minus creditur, postquam semel est perspectum. Quòd autem ad Deum attinet, certè, nisi præjudiciis obruerer, & rerum sensibilibum imagines cogitationem meam omni ex parte obsiderent, nihil illo prius, aut facilius agnoscerem; nam quid ex se est apertius, quàm summum ens esse, sive Deum, ad cujus solius essentiam existentia pertinet existere? Atque quamvis mihi attentâ consideratione opus fuerit ad hoc ipsum percipiendum, nunc tamen non modò de eo æquè certus sum, ac de omni alio, quòd certissimum videtur; sed præterea etiam animadverto cæterarum rerum certitudinem ab hoc ipso ita pendere, ut absque eo nihil unquam perfectè sciri possit.

Etsi enim ejus sim naturæ, ut quamdiu aliquid valde clarè, & distinctè percipio, non possim non credere verum esse, quia tamen ejus etiam sum naturæ, ut non possim obtutum mentis in

can-

eandem rem semper defigere ad illam clarè percipiendam, recurratque sæpè memoria iudicii ante facti, cùm non amplius attendo ad rationes, propter quas tale quid iudicavi, rationes aliæ afferri possunt, quæ me, si Deum ignorarem, facilè ab opinione deicerent, atque ita de nullâ unquam re veram, & certam scientiam, sed vagas tantùm, & mutabiles opiniones haberem. Sic, exempli causâ, cùm naturam trianguli considero, evidentissimè quidem mihi, utpote Geometriæ principiis imbuto, apparet ejus tres angulos æquales esse duobus rectis; nec possum non credere id verum esse, quamdiù ad ejus demonstrationem attendo, sed statim atque mentis aciem ab illâ deflexi, quantumvis adhuc recorder me illâ clarissimè perspexisse, facilè tamen potest accidere, ut dubitem an sit vera, si quidem Deum ignorem: possum enim mihi persuadere me talem à naturâ factum esse, ut interdum in iis fallar, quæ me puto, quàm evidentissimè percipere, cùm præsertim meminerim me sæpè multa pro veris, & certis habuisse, quæ postmodum aliis rationibus adductus falsa esse iudicavi.

Postquam verò percepi Deum esse, quia simul etiam intellexi cætera omnia ab eo pendere, illumque non esse fallacem; atque inde collegi illa omnia, quæ clarè, & distinctè percipio necessariò esse vera, etiam si non attendâ amplius ad rationes propter quas istud verum esse iudicavi; modò tantùm recorder, me clarè, & distinctè perspexisse,

Spexisse, nulla ratio contraria afferri potest, quæ me ad dubitandum impellat, sed veram, & certam de hoc habeo scientiam; neque de hoc tantum, sed & de reliquis omnibus, quæ memini me aliquando demonstrasse, ut de Geometricis, & similibus; quid enim nunc mihi opponetur? Mene talem factum esse, ut sæpe fallar? At jam scio me in iis, quæ perspicuè intelligo falli non posse: mene multa alias pro veris, & certis habuisse, quæ postea falsa esse deprehendi? atqui nulla ex iis clarè, & distinctè perceperam, sed hujus regulæ veritatis ignarus ob alias causas fortè credideram, quas postea minus firmas esse detexi. Quid ergo dicetur? anne (ut nuper mihi objiciebam) me fortè somniare, si vè illa omnia, quæ jam cogito non magis vera esse, quàm ea, quæ dormienti occurrunt? imò etiam hoc nihil mutat, nam certè, quamvis somniarem, si quid intellectui meo sit evidens, illud omnino est verum.

Atque ita planè video omnis scientiæ certitudinem, & veritatem ab unâ veri Dei cognitione pendere, adeo ut priusquam illū nossem, nihil de ullâ aliâ re perfectè scire potuerim. Jam verò innumera tum de ipso Deo, aliisque rebus intellectualibus, tum etiam de omni illâ naturâ corporeâ, quæ est puræ Matheseos objectum, mihi planè nota, & certa esse possunt.

ME-

MEDITATIO VI.

*De Rerum materialium existentia, & reali
mentis à corpore distinctione.*

Reliquum est, ut examinem an res materiales existant : & quidem jam ad minimum scio, illas, quatenus sunt puræ Matheseos objectum, posse existere, quandoquidem ipsas clarè, & distinctè percipio. Non enim dubium est, quin Deus sit capax ea omnia efficiendi, quæ ego sic percipiendi sum capax ; nihilque unquam ab illo fieri non posse judicavi, nisi propter hoc, quòd, illud à me distinctè percipi repugnaret. Præterea ex imaginandi facultate, quâ me uti experior, dum circa res istas materiales verbor, sequi videtur illas existere : nam attentius consideranti, quidnam sit imaginatio, nihil aliud esse apparet, quàm quædam applicatio facultatis cognoscitivæ ad corpus ipsi intimè præsens, ac proinde existens.

Quòd ut planum fiat, primò examino differentiam, quæ est inter imaginationem, & puram intellectionem. Nempe, exempli causâ, cum triangulum imaginor, non tantum intelligo illud esse figuram tribus lineis comprehensam, sed simul etiam istas tres lineas, tanquam præsentés, acie mentis intueor ; atque hoc est, quòd imaginari appello. Si verò de chiliogono velim cogitare,

E equi-

equidem æque bene intelligo illud esse figuram
constantem mille lateribus, ac intelligo triangu-
lum esse figuram constantem tribus: sed non eo-
dem modo illa mille latera imaginor, sivè tanquã
præsentia intueor: & quamvis tunc, propter
consuetudinem aliquid semper imaginandi, quo-
ties de re corporeã cogito, figuram fortè aliquam
confusè mihi repræsentem, patet tamen illam non
esse chiliogonum, quia nullâ in re est divesa ab
eâ, quam mihi etiam repræsenterem, si de myrio-
gono, aliãve quavis figurâ plurimorum laterum
cogitarem; nec quicquam juvat ad eas proprie-
tates, quibus chiliogonum ab aliis polygonis
differt, agnoscendas. Si verò de pentagono
quæstio sit; possum quidem ejus figuram intelli-
gere, sicut figuram chiliogoni, absque ope imagi-
nationis; sed possum etiam eandem imaginari, ap-
plicando scilicèt aciem mentis ad ejus quinque
latera, simulque ad aream iis contentam; & ma-
nifestè hîc animadverto mihi peculiari quadam
animi contentione opus esse ad imaginandum,
quã non utor ad intelligendum: quæ nova animi
contentio, differentiam inter imaginationem, &
intellectionem puram, clarè ostendit. Ad hæc
confidero istam vim imaginandi, quæ in me est,
prout differt à vi intelligendi, ad mei ipsius, hoc
est, ad mentis meæ essentiam non requiri; nam
quamvis illa à me abesset, procul dubio manerem
nihilominus ille idem, qui nunc sum; unde sequi
videtur illam ab aliquâ re à me diversâ pendere;
atque

atque facile intelligo, si corpus aliquod existat, cui mens sit ita conjuncta, ut ad illud veluti inspicendum, pro arbitrio, se applicet, fieri posse, ut per hoc ipsum res corporeas imaginer; aded ut hic modus cogitandi in eo tantum à purâ intellectione differat, quod mens, dum intelligit, se ad seipsam quodammodo convertat, respiciatque aliquam ex ideis, quæ illi ipsi insunt; dum autem imaginatur, se convertat ad corpus, & aliquid in eo ideæ vel à se intellectæ, vel sensu perceptæ conformæ intueatur. Facile, inquam, intelligo imaginationem ita perfici posse, siquidem corpus existat; & quia nullus alius modus æque conveniens occurrit ad illam explicandam, probabiliter inde conjicio, corpus existere; sed probabiliter tantum: & quamvis accuratè omnia investigem, nondum tamen video ex eâ naturæ corporeæ ideâ distinctâ, quam in imaginatione meâ invenio, ullum sumi posse argumentum, quod necessariò concludat aliquod corpus existere:

Soleo verò alia multa imaginari, præter illam naturam corpoream, quæ est puræ Matheseos objectum, ut colores, sonos, sapes, dolorem, & similia, sed nulla tam distinctè; quia hæc percipio melius sensu, à quo videntur, ope memoriæ, ad imaginationem pervenisse; ut commodius de ipsis agam, eadem operâ etiam de sensu est agendum, videndumque an ex iis quæ isto cogitandi modo, quem sensum appello, percipiuntur,

certum aliquod argumentum pro rerum corporum existentia habere possim . Et primò quidem apud me hìc repetam, quænam illa sint, quæ antehac , ut sensu percepta vera esse putavi , & quas ob causas id putavi; deinde etiam causas expendam , propter quas eadem postea in dubium revocavi; ac denique cõsiderabo quid mihi nunc de iisdem sit credendũ. Primò itaque sensi me habere caput, manus, pedes, & membra cætera, ex quibus constat illud corpus , quod tanquam mei partem, vel fortè etiam tanquam me totum spectabam; sensuque hoc corpus inter alia multa corpora versari , à quibus variis commodis, vel incommodis affici potest , & commoda ista sensu, quodam voluptatis, & incommoda sensu doloris metiebar . Atque præter dolorem, & voluptatẽ, sentiebam etiam in me famem, sitim , aliosque ejusmodi appetitus ; itemque corporeas quasdam propensiones ad hilaritatem, ad tristitiam, ad irã, similesque alios affectus ; foris verò , præter corporum extensionem, & figuras , & motus, sentiebam etiam in illis duritiem , & calorem , aliasque tactiles qualitates , ac præterea lumen , & colores, & odores, & sapes, & sonos , ex quarum varietate cælum , terram, maria , & reliqua corpora ab invicem distinguebam ; nec sanè absque ratione ob ideas istarum omnium qualitatum, quæ cogitationi meæ se offerebant , & quas solas propriè, & immediatè sentiebam , putabam me sentire res quasdam à meâ cogitatione planè di-

diversas , nempe corpora , à quibus idæ istæ procederent : experiebar enim illas , absque ullo meo consensu , mihi advenire , adeo ut neque possem objectum ullum sentire , quamvis vellem , nisi illud sensus organo esset præsens ; nec possem non sentire , cùm erat præsens ; cumque idæ sensu perceptæ , essent multò magis vividæ , & expressæ , & suo etiam modo magis distinctæ , quàm ullæ ex iis , quas ipse prudens , & sciens meditando effingebā , vel memoriæ meæ impressas advertebam , fieri non posse videbatur , ut à me ipso procederent ; ideoque supererat , ut ab aliis quibusdam rebus advenirent : quarum rerum , cùm nullam aliunde notitiam haberem , quàm ex istis ipsis ideis , non poterat aliud mihi venire in mentem , quàm illas iis similes esse . Atque etiam quia recordabar me prius usum fuisse sensibus , quàm ratione , videbamque ideas , quas ipse effingebam , non tam expressas esse , quàm illæ erant , quas sensu percipiebam , & plerumque ex earum partibus componi , facile mihi persuadebam , nullam planè me habere in intellectu , quam non prius habuisssem in sensu . Non etiam sinè ratione corpus illud , quod speciali quodam jure meum appellabam , magis ad me pertinere , quàm alia ulla arbitrabar ; neque enim ab illo poteram unquam sejungi , ut à reliquis ; omnes appetitus , & affectus in illo , & pro illo sentiebam ; ac denique dolorem , & titillationem voluptatis in ejus partibus , non autem in

aliis extra illud positis advertebam. Cur verò ex isto, nescio quo doloris sensu, quædam animi tristitia, & ex sensu titillationis lætitia quædam consequatur, curve illa, nescio quæ vellicatio ventriculi, quam famem voco, me de cibo sumendo admoncat, gutturis verò ariditas de potu, & ita de cæteris, non aliam sanè habebam rationem, nisi quia ita doctus sum à naturâ; neque enim ulla planè est affinitas (saltem quam ego intelligam) inter istam vellicationem, & cibi sumendi voluntatē, si vè inter sensum rei dolorē inferentis, & cogitationē tristitiæ ab isto sensu exortæ. Sed & reliqua omnia, quæ de sensu objectis judicabā, videbar à naturâ didicisse: prius enim illa ita se habere mihi persuaserā, quàm rationes ulla, quibus hoc ipsū probaretur, expendissem.

Postea verò multa paulatim experimenta, fidem omnem, quam sensibus habueram labefactarunt; nam & interdum turres, quæ rotundæ visæ fuerant è longinquo, quadratæ apparebant è propinquo, & statux permagnæ in earum fastigiis stantes, non magæ, è terrâ spectanti, videbantur; & talibus aliis innumeris in rebus sensuum externorum iudicia falli deprehendebam; nec externorum duntaxat, sed etiam internorū; nam quid dolore intimius esse potest? atqui audiveram aliquando ab iis, quibus crus aut brachium fuerat abscissum, se sibi videri adhuc interdum dolorem sentire in eā parte corporis, quæ carebant; ideoque etiam in me non planè certum esse

esse vidēbatur membrum aliquod mihi dolere ; quamvis sentirem in eo dolorem . Quibus etiam duas maximè generales dubitandi causas nuper adjeci : prima erat, quòd nulla unquam dum vigilo me sentire crediderim, quæ non etiam inter dormiendum possim aliquando putare me sentire ; cumque illa , quæ sentire mihi videor in somnis, non credam à rebus extra me positis mihi advenire, non advertēbam, quare id potius crederem de iis , quæ sentire mihi videor vigilando . Altera erat , quòd cum auctorem meæ originis adhuc ignorarem, vel saltem ignorare me fingerē, nihil videbā ob stare, quo minus essem naturā ita constitutus, ut fallerer, etiam in iis, quæ mihi verissima apparebant . Et quantum ad rationes, quibus antea rerum sensibilibus veritatem mihi persuaferam, nō difficulter ad illas respondebam . Cum enim viderer ad multa impelli à naturā , quæ ratio dissuadebat , non multum fidendum esse putabam iis, quæ à naturā docentur . Et quāvis sensuum perceptiones à voluntate meā non penderent , non ideo concludendum esse putabam , illas à rebus à me diversis procedere , quā fortè aliqua esse potest in me ipso facultas , et si mihi nondum cognita, illarum effectrix .

Nunc autem postquā incipio me ipsum, meæque auctorem originis melius nosse ; non quidem omnia , quæ habere videor à sensibus , puto esse temerè admittenda ; sed neque etiam omnia in dubium revocanda .

Et primò quoniam scio, omnia, quæ clarè, & distinctè intelligo, talia à Deo fieri posse, qualia illa intelligo, satis est, quòd possim unam rem absque alterâ clarè, & distinctè intelligere, ut certus sim unam ab alterâ esse diversam, quia potest, saltem à Deo, seorsim poni; & non refert à quâ potentiâ id fiat, ut diversa existimetur; ac proinde ex hoc ipso, quòd sciam me existere, quodque interim nihil planè aliud ad naturam, sivè essentiam meam pertinere animadvertam, præter hoc solum, quod sim res cogitans, rectè concludo, meam essentiam in hoc uno consistere, quòd sim res cogitans. Et quamvis fortasse (vel potiùs, ut postmodum dicam, pro certo) habeam corpus, quod mihi valde arctè conjunctum est, quia tamen ex unâ parte claram, & distinctam habeo ideam mei ipsius, quatenus sum tantùm res cogitans, non extensa; & ex aliâ parte distinctam ideam corporis, quatenus est tantùm res extensa, non cogitans, certùm est me à corpore meo reverà esse distinctum, & absque illo posse existere.

Præterea invenio in me facultates specialibus quibusdam modis cogitandi præditas, putà facultates imaginandi, & sentiendi; sinè quibus totum me possum clarè, & distinctè intelligere, sed non vice versa illas sinè me, hoc est sinè substantiâ intelligente, cui insint: intellectionem enim nonnullam in suo formali conceptu includunt, unde percipio illas à me, ut modos à redistingui.

stingui. Agnosco etiam quasdam alias facultates, ut locum mutandi, varias figuras induendi, & similes, quæ quidem, non magis, quàm præcedentes, absque aliquâ substantiâ, cui insint possunt intelligi, nec proinde etiam absque illâ existere. Sed manifestum est has, siquidem existant, inesse debere substantiæ corporeæ, sive extensæ, non autem intelligenti, quia nempe aliqua extensio, non autem ulla planè intellectio in earum claro, & distincto conceptu continetur. Jam verò est quidem in me passiva quædam facultas sentiendi, sive ideas rerum sensibilibum recipiendi, & cognoscendi, sed ejus nullum usum habere possem, nisi quædam activa etiam existeret, sive in me, sive in alio, facultas istas ideas producendi, vel efficiendi. Atque hæc sanè in me ipso esse non potest, quia nullam plane intellectio-nem præsupponit, & me non cooperante, sed sæpe etiam invito ideæ istæ producuntur: ergo superest, ut sit in aliquâ substantiâ à me diversâ, in quâ, quoniam omnis realitas, vel formaliter, vel eminenter inesse debet, quæ est objectivè in ideis ab istâ facultate productis, (ut jam supra animadverti) vel hæc substantia est corpus, sive natura corporea, in quâ nempe omnia formaliter continentur, quæ in ideis objectivè, vel certè Deus est, vel aliqua creatura corpore nobilior, in quâ continentur eminenter: atqui cum Deus, non sit fallax, omnino manifestum est, illum nec per se immediatè istas ideas mihi immittere, nec etiam

etiam mediante aliquâ creaturâ , in quâ earum realitas objectiva, non formaliter, sed eminenter tantum contineatur . Cùm enim nullam planè facultatem mihi dederit ad hoc agnoscendum, sed contrâ, magnam propensionem ad credendum illas à rebus corporeis emitti , non video quâ ratione posset intelligi, ipsum non esse fallacem, si aliunde, quàm à rebus corporeis emitterentur : ac proinde res corporeæ existunt . Non tamen fortè omnes tales omninò existunt , quales illas sensu comprehendo; quoniam ista sensuum comprehensio in multis valdè obscura est, & confusa; sed saltem illa omnia in iis sunt, quæ clarè , & distinctè intelligo, id est omnia generaliter spectata, quæ in parte Matheseos objecto comprehenduntur .

Quantum autem attinet ad reliqua , quæ vel tantum particularia sunt, ut quod sol sit talis magnitudinis, aut figuræ, &c. vel minus clarè intellecta, ut lumen, sonus, dolor, & similia, quamvis valde dubia , & incerta sint , hoc tamen ipsum , quod Deus non sit fallax , quodque idcirco fieri non possit , ut ulla falsitas in meis opinionibus reperiatur ; nisi aliqua etiam sit in me facultas à Deo tributa ad illâ emendandam, certâ mihi spem ostendit veritatis etiam in iis assequendæ . Et sanè non dubium est, quin ea omnia, quæ doceor à naturâ aliquid habeant veritatis . Per naturam enim generaliter spectatam nihil nunc aliud , quàm vel Deum ipsum , vel rerum creaturam

coor-

coordinationem à Deo institutam intelligo , nec aliud per naturam meam in particulari , quàm complexionem eorum omnium, quæ mihi à Deo sunt tributa .

Nihil autem est, quòd me ista natura magis expressè doceat, quàm quòd habeam corpus, cui male est cum dolorem sentio: quòd cibo, vel potu indiget, cum famem aut sitim patior, & similia ; nec proinde dubitare debeo, quin aliquid in eo sit veritatis.

Docet etiam natura , per istos sensus doloris, famis, sitis, &c. me non tantum adesse meo corpori, ut nauta adest navigio, sed illi arctissime esse conjunctum , & quasi permixtum, adeo ut unum, quid cum illo componam ; alioqui enim, cum corpus læditur, ego, qui nihil aliud sum, quàm res cogitans, non sentirem idcirco dolorem, sed puro intellectu læsionem istam perciperem ; ut nauta visu percipit, si quid in nave frangatur ; & cum corpus cibo, vel potu indiget, hoc ipsum expressè intelligerem, non confusos famis, & sitis sensus haberem . Nam certè isti sensus sitis, famis, doloris, &c. nihil aliud sunt, quàm confusi quidam cogitandi modi ab unione , & quasi permixtione mentis, cum corpore exorti.

Præterea etiam doceor à naturâ varia circa meum corpus alia corpora existere , ex quibus nonnulla mihi proseguenda sunt, alia fugienda. Et certè ex eo quòd valde diversos sentiam colores, sonos, odores, sapores, calorem, duritiem, & similia,

lia, rectè concludo, aliquas esse in corporibus, à quibus varix istæ sensuum perceptiones adveniunt, varietates iis respondentes, etiam si fortè iis non similes; atque ex eo quòd quædam ex illis perceptionibus mihi gratæ sint, aliæ ingratae, planè certum est, meum corpus, sive potius me totum, quatenus ex corpore, & mente sum compositus, variis commodis, & incommodis à circumjacentibus corporibus affici posse.

Multa verò alia sunt, quæ etsi videar à naturâ doctus esse, non tamen reverà ab ipsâ, sed à consuetudine quadam inconsideratè judicandi accipi, atque ideo falsa esse faciliè contingit; ut quòd omne spatium, in quo nihil planè occurrit, quòd meos sensus moveat sit vacuum; quòd in corpore, exempli gratiâ, calido aliquid sit planè simile idæ caloris, quæ in me est: in albo, aut viridi sit eadem albedo, aut viriditas, quam sentio; in amaro, aut dulci idem sapor, & sic de cæteris; quòd & astra, & turre, & quævis alia remota corpora ejus sint tantum magnitudinis, & figuræ, quam sensibus meis exhibent, & alia ejusmodi. Sed nè quid in hac re non satis distinctè percipiam, accuratius debeo definire, quid propriè intelligam, cum dico me aliquid doceri à naturâ; nempe hanc naturam strictius sumo, quam pro complexione eorum omnium, quæ mihi à Deo tributa sunt; in hac enim complexione, multa continentur, quæ ad mentem solam pertinent, ut quòd percipiam, id quòd factum est, infectum esse non posse, &
reli-

reliqua omnia, quæ lumini naturali sunt nota, de quibus hîc, non est sermo; multa etiam, quæ ad solum corpus spectant, ut quodd deorsum tendat, & similia, de quibus etiam non ago, sed de iis tantum, quæ mihi, ut composito ex mente, & corpore, à Deo tributa sunt: ideoque hæc natura docet quidem ea resurgere, quæ sensum doloris inferunt, & ea prosequi, quæ sensum voluptatis, & talia: sed non apparet illam præterea nos docere, ut quicquam ex istis sensuum perceptionibus, sine prævio intellectus examine de rebus extra nos positis cõcludamus, quia de iis verum scire ad mentem solam, non autem ad compositum videtur pertinere. Ità quamvis stella non magis oculum meum, quàm ignis exiguæ facis afficiat, nulla tamen in eo realis, sive positiva propensio est ad credendum illam non esse maiorem, sed hoc sine ratione ab ineunte ætate judicavi; & quamvis ad ignem accedens, sentio calorem, ut etiam ad eundem nimis prope accedens, sentio dolorem, nulla profectò ratio est, quæ suadeat in igne aliquid esse simile isti calori; ut neque etiam isti dolori: sed tantummodò in eo aliquid esse, quodcunque demum sit, quodd istos in nobis sensus caloris, vel doloris efficiat: & quamvis etiam in aliquo spatio nihil sit, quod moveat sensum, nõ ideo sequitur in eo nullum esse corpus, sed video me in his, aliisque permultis ordinem naturæ pervertere esse assuetum; quia nempe sensuum perceptionibus, quæ propriè tantum à naturâ datæ sunt

ad

ad menti significandum quænam compositio ,
cujus pars est, commoda sint, vel incommoda, &
eatenus sunt satis claræ, & distinctæ, ut or tan-
quam regulis certis ad immediatè dignoscendū ,
quænam sit corporum extra nos positorum ef-
fentia, de quâ tamen nihil, nisi valdè obscure, &
confusè significant.

Atqui jam ante satis perspexi, quâ ratione, nō
obstante Dei bonitate, judicia mea falsa esse con-
tingat. Sed nova hîc occurrit difficultas circa illa
ipsa, quæ tanquam perfequenda, vel fugienda mi-
hi à naturâ exhibentur ; atque etiam circa inter-
nos sensus, in quibus errores videor deprehen-
disse. Ut cùm quis grato cibi alicujus sapore
delusus, venenum intus latens assumit : sed
nempe tunc tantùm à naturâ impellitur ad illud
appetendum, in quo gratus sapor consistit ; non
autem ad venenum, quod plane ignorat ; nihil-
que hinc aliud concludi potest, quàm naturam
istam non esse omnisciam : quod non mirum,
quia cùm homo sit res limitata, non alia illi com-
petit, quàm limitatæ perfectionis.

At verò, non rarò etiam in iis erramus, ad quæ
a naturâ impellimur ; ut cùm ii, qui ægrotant ,
potum vel cibum appetunt sibi paulò post noci-
turum. Dici forsân hîc poterit illos ob id errare,
quod natura eorum sit corrupta; sed hoc difficul-
tatem non tollit, quia non minus verè homo
ægrotus creatura Dei est, quàm sanus; nec proin-
de minus videtur repugnare illum à Deo falla-
cem

cem naturam habere. Atque ut horologium ex
 rotis, & ponderibus confectum, non minus ac-
 curatè leges omnes naturæ observat, cùm malè
 fabricatum est, & horas non rectè indicat, quàm
 cùm omni ex parte artificis voto satisfacit. Ita
 si considerem hominis corpus, quatenus machi-
 namentum quoddam est, ex ossibus, nervis, mu-
 sculis, venis, sanguine, & pellibus ita aptatum,
 & compositum, ut, etiamsi nulla in eo mens exi-
 steret, eosdem tamen haberet omnes motus, qui
 nunc in eo, non ab imperio voluntatis, nec pro-
 inde à mente procedunt. Facile agnosco illi æque
 naturale fore, si, exempli causâ, hydropè laboret
 eam faucium ariditatem pati, quæ sitis sensum
 menti inferre solet; atque etiam ab illâ ejus ner-
 vos, & reliquas partes ita disponi, ut potû sumat,
 ex quo morbus augeatur, quàm cùm nullum
 tale in eo vltium est, à simili faucium siccitate
 moveri ad potum sibi utilem assumendum. Et
 quamvis respiciens ad præconceptum horologii
 usum dicere possim illud, cùm horas non rectè
 indicat, à naturâ suâ defletere; atque eodem mo-
 do considerans machinamentum humani corpo-
 ris tanquam comparatû ad motus, qui in eo fieri
 solent, putem illud etiam à naturâ suâ aberrare, si
 ejus fauces sint aridæ, cùm potus ad ipsius con-
 servationem non prodest; satis tamen animad-
 verto hanc ultimam naturæ acceptionem ab al-
 terâ multùm differre; hæc enim nihil aliud est,
 quàm denominatio à cogitatione meâ hominem
 agro-

ægrotum, & horologium male fabricatum, cum
idea hominis sani, & horologii rectè facti compa-
rante dependens, rebusque de quibus dicitur ex-
trinfeca, per illam verò aliquid intelligo, quòd
reverà in rebus reperitur, ac proinde non nihil
habet veritatis.

At certè etiamfi respiciendò ad corpus hydro-
pe laborans, sit tantum denominatio extrinfeca,
cùm dicitur ejus natura esse corrupta, ex eo
quòd aridas habet fauces, nec tamen egeat potu;
respiciendo tamen ad compositum, sive ad men-
tem tali corpori unitam, non est pura denomina-
tio, sed verus error naturæ, quòd sitiat, cùm po-
tus est ipsi nociturus; ideoque hìc remanet inqui-
rendum, quo pacto bonitas Dei non impediat,
quo minus naturà sic sumpta sit fallax.

Nempe imprimis hìc adverto magnam esse
differentiam inter mentem, & corpus, in eo, quòd
corpus ex naturà suà sit semper divisibile, mens
autem planè indivisibilis; nam sanè cùm hanc cõ-
sidero, sive me ipsum, quatenus sum tantùm res
cogitans, nullas in me partes possum distinguere,
sed rem planè unam, & integram me esse intelli-
go: & quamvis toti corpori tota mens unita esse
videatur, abscisso tamen pede, vel brachio, vel
quâvis alià corporis parte, nihil idco de mente
subductum esse cognosco; neque etiam faculta-
tes volendi, sentiendi, intelligendi, &c. ejus partes
dici possunt, quia una, & eadem mens est, quæ
vult, quæ sentit, quæ intelligit. Contrà verò
nulla

nulla res corporea, sive extensa potest à me cogitari, quam non faciliè in partes cogitatione dividam; atque hoc ipso illam divisibilem esse intelligam: quòd unum sufficeret ad me docendum mentem à corpore omninò esse diversam, si nondum illud aliundè satis scirem.

Deindè adverto mentem non ab omnibus corporis partibus immediatè affici, sed tantummodò à cerebro, vel fortè etiam ab unâ tantùm exiguâ ejus parte, nempè ab eâ, in quâ dicitur esse sensus communis; quæ quotiescunque eodem modo est disposita, menti idem exhibet; etiamsi reliquæ corporis partes diversis interim modis possint se habere, ut probant innumera experimenta, quæ hîc recensere non est opus.

Adverto præterea eam esse corporis naturam, ut nulla ejus pars possit ab aliâ parte aliquantum remotâ moveri, quin possit etiam moveri eodem modo à qualibet ex iis, quæ interjacent, quamvis illa remotior nihil agat. Ut, exempli causâ, in fune, A, B, C, D, si trahatur ejus ultima pars D, non alio pacto movebitur prima A, quàm moveri etiam posset si traheretur una ex intermediis B, vel C, & ultima D maneret immota. Nec dissimili ratione, cùm sentio dolorem pedis, docuit me Physica, sensum illum fieri opere nervorum per pedem sparsorum, qui indè ad cerebrum usque, funium instar, extensi, dum trahuntur in pede, trahunt etiam intimas cerebri partes, ad quas pertingunt, quemdamque mo-

F

tum

tum in iis excitant, qui institutus est à naturâ; ut mentem afficiat sensu doloris, tanquam in pede existentis: sed quia illi nervi per tibiam, crus, lumbos, dorsum, & collum transire debent, ut à pede ad cerebrum perveniant, potest contingere, ut etiamsi eorum pars, quæ est in pede non attingatur, sed aliqua tantùm ex intermediis, idem planè ille motus fiat in cerebro, qui fit pede malè affecto, ex quo necesse erit, ut mens sentiat eundem dolorem: & idem de quolibet alio sensu est putandum.

Adverto denique, quandoquidem unusquisque ex motibus, qui fiunt in eâ parte cerebri, quæ immediatè mentem afficit, non nisi unum aliquem sensum illi infert, nihil hæc in re meliùs posse excogitari, quàm si eum inferat, qui ex omnibus, quos inferre potest ad hominis sani conservationem, quàm maximè, & quàm frequentissimè conducit. Experientiam autem testari tales esse omnes sensus nobis à naturâ inditos; ac proindè nihil planè in iis reperiri, quòd non Dei potentiam, bonitatemque testetur. Ita, exempli causâ, cùm nervi, qui sunt in pede, vehementer, & præter consuetudinem moventur, ille eorum motus per spinæ dorsi medullam ad intima cerebri pertingens, ibi menti signum dat ad aliquid sentiendum, nempe dolorem tanquam in pede existentem, à quo illa excitatur ad ejus causam, ut pedi infestam, quantum in se est, amovendam. Potuisset verò natura hominis à Deo sic

fic constitui, ut ille idem motus in cerebro quidvis aliud menti exhiberet; nempè vel seipsum, quatenus est in cerebro, vel quatenus est in pede, vel in aliquo ex locis intermediis, vel denique aliud quidlibet; sed nihil aliud ad corporis conservationem æquè conduxisset. Eodem modo cum potu indigemus, quædam indè oritur siccitas in gutture nervos ejus movens, & illorum ope cerebri interiora; hincque motus mentem afficit sensu sitis, quia nihil in toto hoc negotio nobis utiliùs est scire, quàm quòd potu ad conservationem valetudinis egeamus; & sic de cæteris.

Ex quibus omninò manifestum est, non obstante immensâ Dei bonitate, naturam hominis, ut mente, & corpore compositi, non posse non aliquando esse fallacem. Nam si quæ causa non in pede, sed in aliâ quâvis ex partibus, per quas nervi à pede, ad cerebrum porriguntur, vel etiam in ipso cerebro eundem planè motum excitet, qui solet excitari pede malè affecto, sentietur dolor tanquam in pede, sensusque naturaliter falletur, quia cum ille idem motus in cerebro non possit nisi eundem semper sensum menti inferre, multòque frequentius oriri soleat à causâ, quæ lædit pedem, quàm ab aliâ alibi existente, rationi consentaneum est, ut pedis potiùs, quàm alterius partis dolorem menti semper exhibeat. Etsi quando faucium ariditas non ut solet ex eo, quòd ad corporis valetudinem potus conducatur,

ex contrariâ aliquâ causâ oriatur, ut in hydrophico contingit, longè meliùs est illam tunc fallere, quàm si contra semper falleret, cùm corpus est benè constitutum; & sic de reliquis.

Atque hæc consideratio plurimum juvat, non modò, ut errores omnes, quibus natura mea obnoxia est, animadvertam, sed etiam ut illos, aut emendare, aut vitare faciliè possim. Nam sanè cùm sciam omnes sensus circa ea, quæ ad corporis commodum spectant multò frequentius verum indicare, quàm falsum, possimque uti ferè semper pluribus ex iis ad eandem rem examinandam; & insuper memoria, quæ præsentia cum præcedentibus connectit; & intellectu, qui jam omnes errandi causas perspexit, non ampliùs vereri debeo, nè illa, quæ mihi quotidie à sensibus exhibentur sint falsa, sed hyperbolicæ superiorum dierum dubitationes, ut risu dignæ sunt explodendæ; præsertim summa illa de somno, quem à vigilia non distinguebam; nunc enim adverto permagnum inter utrumque esse discrimen in eo, quòd numquam insomnia cum reliquis omnibus actionibus vitæ à memoria conjungantur, ut ea, quæ vigilianti occurrunt; nam sanè si quis, dum vigilo, mihi derepente apparet, statimq; postea dispareret, ut fit in somnis, ita scilicet, ut nec undè venisset, nec quò abiret viderem, non immeritò spectrum potiùs, aut phantasma in cerebro meo effectum, quàm verum hominem esse judicarem. Cùm verò ex res, occurrunt,

occurrunt, quas distinctè, undè, ubi, & quando mihi adveniant adverto, earumque perceptionem, absque ullâ interruptione cum totâ reliquâ vitâ connecto, planè certus sum non in somnis, sed vigilanti occurrere. Nec de ipsarum veritate debeo, vel minimum dubitare, si postquam omnes sensus, memoriam, & intellectum ad illas examinandas convocavi, nihil mihi, quod cum cæteris pugnet ab ullo ex his nuncietur. Ex eo enim, quod Deus non sit fallax, sequitur omnino in talibus me non falli. Sed quia rerum agendarum necessitas, non semper tam accurati examinis morem concedit, fatendum est humanam vitam circa res particulares sæpè erroribus esse obnoxiam, & naturæ nostræ infirmitas est agnoscenda.

A D
MEDITATIONES
RENATI
DES-CARTES

NOTÆ,

Ex variis, doctissimisque Autho-
ribus excerptæ.

A D P R I M A M.



*I*n animum Philosophus induxe-
rat suum, assiduâ, diuturnâque con-
templatione, firmiorem, & certio-
rem investigare cognitionem, quam
putabat usque huc in scholis tradi.
Ad finem eum impetrandum, judi-
cabat esse omninô necessariam, ut quæ præteritâ
ætate credidisset, vel didicisset omnia, quoniam
infirmis, & instabili niterentur fundamento, sen-
suum,

sum nempe, haud raro nos decipientium testimonio, simul, & semel in dubium revocaret, & veluti falsæ essent, e mente deleret: architectum imitatus, qui diruit ædificium vetus, ruinam minitans, ut ejus loco novum solidius, & concinnius extruat.

Invisa dubitationis vox est: res ipsa tenetur, ab omnibus assensum esse cohibendum, donec veritatem evidenter percipiamus. Damnamus namque Judicem pro tribunali sedentem, qui nondum auditâ parte utrâque, sententiam pronunciat: & noster animus sustinebit judicare de iis, quæ aut ignorat omnino, aut non satis diligenter investigavit? Rectè Arcisilas apud Ciceronem lib. 1. quæst. Academic., nihil, aiebat, oportere neque profiteri, neque e affirmare quemquam, neque assertionem approbare, cohibereque semper, & ab omni lapsu continere temeritatem, quæ tùm esset insignis, cùm aut falsa, aut incognita res approbaretur, neque hoc quicquam esse turpius, quàm cognitioni, & perceptioni assertionem approbationemq; præcurrere. Et Cicero ipse in Lucullum. Quamobrem cùm tam vitiosum esse constet assentiri quidquam, aut falsum, aut incognitum: Sustinenda est potius omnis assensio, nè præcipitet, si temerè processerit. Ita enim finitima sunt falsa veris, eaque quæ percipi possunt (si modò sunt quædam, jam enim videbimus) ut tamen in præcipitem locum non debeat se sapiens committere.

Quandoquidem methodus quâ utitur Cartesius multos offendit, aded ut quidam proprias ipsius Philosophi hypotheses, & sententias esse opinentur, quas ad tempus tantùm admittit, donec ordine legitimo philosophandi eò devenerit, ut easdē refutet, ut genium aliquem malignum, eundemque summè potentem, & callidum omnem suam industriam in eo posuisse, ut nos falleret: Cælum, terram, aërem, colores, figuras, sonos, cunctaque externa nihil aliud esse, quàm ludificationes somniorum. Quibus ipsemet Renatus in Resp. Quartis his verbis respondet. Modus enim scribendi analyticus, quem sequutus sum, id patitur, ut quædam interdum supponantur, quæ nondum sint satis explorata, ut patuit in primâ Meditatione, in quâ multa assumpseram, quæ deinde in sequentibus refutavi. Tales autem hypotheses, sive propositiones inter alias hæ sunt. Sensibus omnem fidem esse denegandam, somnum à vigiliâ non posse distingui; Infixam menti veterem opinionem de Deo, esse falsam, Genium malignum in omnibus nos eludere, Cælum, aërem, terram, colores, figuras, sonos, cunctaque externa nihil aliud esse, quàm ludificationes somniorum. Falsò opinor me habere manus, oculos, carnem, sanguinem, sensum; & cæteræ aliæ id genus. Has autem omnes esse tantùm hypotheses, sive suppositiones ad tempus admissas, conspicuum fiet ex formulis ipsis, quibus utitur ad ipsas exprimendas. Formulæ autem sunt. Age

er-

ergo somniamus: Demus hoc totum de Deo esse fictitium: Putabo Cælum, terram, aërem, &c. omniaque externa nihil esse: Suppono omnia, quæ video esse falsa. Nescio, de hoc jam non disputo. Atque hanc ob causam videmus omnes illas antedictas opiniones ad tempus, ut dixi, admissas, per solidissimas rationes refutatas, negari, & contrarias veritates, sublata omni dubitatione, indubitato assertas, affirmari, ut ex. gr. Deum omnino existere. Med. III. Certissimas notiones de extensione, figurâ, motu, &c. dari. Med. IV. Nos in omnibus non falli, nec à Genio maligno deludi. Eadem Med. Nos corpus, cæteraque membra habere. Alia extra nos corpora, Cælum, terram, aërem, &c. existere. Sensus circa ea, quæ ad corporis commodum spectant, multò frequentius, verum judicare, quàm falsum. Somnum à vigiliâ satis clarè posse distingui. Med. VI.

Quàm fallax sit sensuum fides, experientia convincitur. Ipsa enim nos docet in plurimis illos nos decipere; in multis prorsus deficere. Decipit nos visus, (ut de cæteris taceam) sensuum omnium nobilissimus. Solem, & Lunam ad latitudinem sesquipedalem extendi, acies oculorum videtur dictare; & tantæ præcisæ magnitudinis Epicurus asseruit, quod tamen dictante ratione, & experientia, falsissimum est. Et non modò magnitudinem, & figuram in corporibus non ritè discernit visus, sed in ipsis absolutam, & respectivam celeritatem, vel tarditatem motus ignorat; jacu-
lum

lum enim, vel globum per aërem missum, longe citius ipso Sole procedere judicat. Imò in quo corpore sapè sit motus ignorat, ex. gr., cùm circa marginem navis in navi sedemus, quæ admodum æquali motu fertur, & ad terram, & urbes prospicimus, videntur urbes, & terra recedere, unde Poëta cecinit :

Provehimur portu, terreque, urbefq; recedunt.
Et tam dilucidè se produnt sensuum errores, ut ab omni ævo extiterint viri aliena auctoritate prorsus non occæcati, sed rationis dictamine freti, qui de incertitudine eorumdem conquesti fuere, eosque falsitatis reos egerunt. Primus prodeat Plato, magni nominis omni ævo Philosophus, hic Socratem inducit in Phædone ita loquentem. Cognoscunt viri scientiæ cupidi, quemadmodum philosophia ipsorum, animam ita constitutam suscipiens, paulatim instruit, solvereque aggreditur, ostendens, quàm fallax oculorum, quàm fallax aurium, cæterorumque sensuum sit judicium, suadens ab his discedere, quatenus hære illis, summa non cogit necessitas, seque in seipsam revocare, atque colligere, nec ulli credere, præterquam sibi, &c. Suffragatur quoque dictæ veritati Augustinus lib. VIII. de Civitate Dei cap. VII. Absit, inquit, ut his (Platonicis) comparandi videantur, qui posuerunt judicium veritatis in sensibus corporeis, eorumque infidis, & fallacibus regulis, omnia quæ dicuntur metienda esse cœn-
suerunt, ut Epicurei, & quicumque alii tales

(Pe-

(*Peripatetici*) ut etiam ipsi Stoici. *Et de Platonicis quoque Cicero asserit*. Mentem volebant esse rerum judicem, solam censebant esse idoneam, cui crederetur. *Et hæc veritas aded manifesta est, ut non solum viri philosophiæ ex professo operam navantes, sed & ipsi Poætæ, aliud interim agentes, eandem in trascurso, præ fulgore suo radiantem, conspexerint. Propertius:*

Fallunt nos oculi, vagique sensus

Suppressâ ratione mentiuntur.

Et Claudianus:

Corporis hic damnat sensus, verùmq; videri
Pernegat.

AD MEDITATIONEM SECUNDAM.

ET quoniam cognitum esse haud dubitamus existentiam nostræ mentis: nam si quid cognoscimus, clarum est existere nos, qui cognoscimus; & nemo de re aliqua certus esse potest, nisi prius sciat se existere, cui rei alterius notitia obtingat; de quo puto omnes esse consensuros, ubi respondero ad duo, quæ huic assertioni videntur repugnare.

Prius est, an Deus, Ens illud perfectissimum, quemadmodum est primum, & ante omnes res finitas existit, sit quoque primum cognitum, vel saltem esse debeat? Quam ad quæstionem rectè sol-

ven-

vendam, iuvet in principio observare, quod is, qui novit Deum existere, ceu veritatem ante perceptam, ponat se existere: nisi enim ipse existeret, Deum esse scire nequiret. Sed præcipuum responsionis caput, suppedietur consideratio status, in quo jam humana mens versatur. Scilicet non eo quo ipsæ existunt ordine res novimus, sed ab infimis ad supremum, ab ultimis ad primum, à finitis ad infinitum nos adscendere misera cæci intellectus jubet conditio. Nostra nunc existentia, & essentia nos ducit ad aliquantulam Dei conditoris notitiam, veluti pictura admonet de homine depicto, & lumen de ortu Solis. In altera autem vita, primùm cognoscemus Deum, & penitissimè intuitentes videbimus, quàm pulcros, quàm profundos, quàm diversos insculpsit, tàm in corpore, tàm in animo nostro divinarum perfectionum suarum characteres, in quorum contemplatione omnis nostri notitia consistet.

Posterius, quod occasione primi cogniti interrogari solet, est, an metaphysicæ illæ propositiones per se evidētes, quales sunt: nihil nullum sunt accidentia, impossibile est idem simul esse, & non esse, &c. cognoscantur ante mentis nostræ existentiam, utpote cuius demonstratio dictis enunciationibus nitatur? ideo enim id quod cogitat existere, quia nihil cogitare nequeat? Sed vicissim quæro, quis ea novit axiomata, aut cui illorum veritas sit perspecta? Ad quod respondebitur utique, natura esse nota menti nostræ; quare & hinc infero hæ-

ma-

manam mentem existere, & hanc nos percipere veritatem, prius quàm de metaphysicis illis propositionibus cogitemus; nam propterea quia mens est, de iis cogitare potest.

Est namque acriter, & diu satis in scholis disputatum; an ad essentiam mentis aliud quid pertineat, pràter actum cogitandi? an, & quod sit illud cogitationis subiectum? num cogitatio queat esse substantia? Verùm primò teneamus, quod certum est, mentem esse rem cogitantem, sive cogitare, idque modis diversis, attendendo, percipiendo, volendo, sentiendo, imaginando; deinde in medium relinquamus, de quibus eruditi non dum secum consentiunt, neque definiamus, in animo pràter cogitationem prorsùs nihil esse, neque in illius natura latere forsitan aliud quid nobis haud dum perspectum; aut Deum altera in vita non excitaturum plures, ac novos cogitandi modos, quam eos quos nunc in nobis observamus. Sunt enim hæ arduæ quæstiones: hoc velim investigent amplius, & declarent sapientiæ cultores, quod observamus omnes: quandoquidem in mente nostra fit continua cogitationum separatarum, vel diversarum successio per singula momenta, quibus ea existit, quodnam sit illud principium, quo mens momento primo ad hanc, secundo ad istam, atque tertio ad aliam cogitationem determinetur? Etenim mens cogitare nunquam cessat, sed una cogitatio sequitur alteram sinè intervallo: neque tamen similes semper, aut cognatæ sunt eæ cogitationes,

res, sed quandoque dissimillimæ, ac diversissimæ, cum precedentibus omnino non coherentes, quandoque, & contrariæ. Ego quidem postquam argumentum istud mecum animo reputavi, existimo, principium, quo mens humana ad has, illasve determinatur cogitationes, partim internum, partim externum esse. Internum principium appello eam cogitationem, quæ dum præcedit, mentem determinat ad sequentem. Externum nomino quamcumque rem, quæ licet extra mentem existat, vel ad ejus essentiam non pertineat, in ipsam tamen agit, ejusque cogitationes variare potest. Ita quum vir meditationibus assuetus momento primo sibi proponit definire cogitationem in contemplando, v. g. Sole, per & propter hoc ipsum propositum, momento primo factum, attendit momento secundo ad istud, momento tertio ad aliud Solis attributum, quem tamdiu intuetur, donec naturam ejus percipiat. Lumen porro intellectus, sive clarum, distinctamque rei perceptionem determinare voluntatem, seu blanda vi inclinare, & ducere mentem ad eam rem sive probandam, sive improbandam, sive amandam, sive odio prosequendam, sive expetendam, sive fugiendam, nemo ignorat. Pariter ex una volitione nascitur altera; nam qui vult finem, vult quoque media, quibus statutum finem adipiscatur.

Res extra mentem existentes, vel infinita, vel finitæ sunt; infinita Deus est, finitæ vel sunt corpora, vel spiritus: hi vel sunt conjunctim cum

corpore, vel corpus non habent, uti Angeli. Corpora omnia sunt à mente nostra separata, præter unicum illud, cum quo, lege naturæ, à conditore est conjuncta. Hæcce etenim capita omnia, tanquã certa hoc loco assumere placet. Omnes autem res istæ, infinita, & finita, agunt in mentem humanam, ejusque cogitationes variant, & determinant. Et Deum quidem, Ens infinitum, seu perfectissimum quod attinet, uti est diversa illius ad mentem ratio, ita & diversimodè cogitationes in ea producit: considerari enim potest, sive uti creator, cōservator, rector, legislator, & iudex mundi est, sive quatenus amicitia, aut gratia fœdus cū homine pepigit. Res verd finita omnes, extensa, & cogitantes, queunt agere in mentem humanam, quia licet ab ea sint diversa, & separata, unam tamen cum ea, voluntate Conditoris, constituunt magnam societatem, unum ingens corpus, mundum: sed partem unam agere in aliam, membrum unum in alterum, manifestum est.

Deus quemadmodum in res omnes, sic & in nostram mentem agit voluntate omnipotenti, sancta, & sapiente: spiritus unus cogitatione sua præbet alteri occasionem cogitandi de hac, illave re; ut in Pomponio nascitur cogitatio de quodam negotio, quia & mens Cai de eo cogitat, interdum & vult ut Pomponius de eo cogitet; qui nexus cogitationum Cai, & Pomponii, nequaquam nititur essentiali virtute aliqua mentis alterutrius, sed lege naturali ad mundum regendum la-

ta à Deo, quæ sancivit, ut occasione cogitationis
 auius, creiretur altera, quanquam in subiectis di-
 versis: & quando mens una non determinat alte-
 rius cogitationes, tenendum est, utramque à Crea-
 tore non esse eodem in gradu, vel eadem in linea
 collocatam, idest mentem Pomponii planè nulla
 esse indutam relatione ad mentem Cai, sive alte-
 ram cum altera nihil habere commune. Mens sci-
 licet incolæ sinensis, nunquam determinat cogita-
 tiones hominis in remotissimo Europæ angulo posi-
 ti, quoniam Deus nullam inter utrumque commu-
 nationem, aut relationem peculiarem instituit. Cor-
 pora omnia, cùm propria, tàm aliena agunt in
 mentem per sensus, obijciendo iis res obvias, quæ
 ad sensorium commune delatæ, intellectu perci-
 piuntur, mox voluntatem determinant.

Hiscæ præmissis, videndum jam est, an huma-
 nae mentis cogitationes dissimillimas quidem, &
 nulla adfinitate conjunctas, sæpè & contrarias, ca-
 tenata tamen serie, & nunquam interrupto ordi-
 ne, sibi invicem succedentes, suis ex principiis
 arcessere queamus, ut quis in nobis agat, pruden-
 ter, & utiliter discernere discamus. Sed illud
 præmonere oportet, hæud omnia, quæ de isto argu-
 mento sumus dicturi, fidenter nos ac temerè adfir-
 mare, nedum lectori credenda obtrudere; verùm
 conjecturando nonnulla, & opinando, sapientiori-
 bus, atque ingeniosioribus occasionem præbere vel-
 lem, ut postquam leges motûs corporum tam est à
 Philosophis inquisitum diù, ac sedulo, & solerter;
 tan-

tandem, & regulas cogitationum mentis humanae indagare, orbique literato communicare non dedignentur.

Fingamus igitur, Pomponium momento primo cogitare de faciendo itinere, secundo velle id ipsum adgredi, tertio, quarto, quinto, & sexto dum in via est, negotium expediendum meditari; atque septimo, cogitatione subita, statueret de relinquenda semita, qua aliàs volebat progredi, quaque si perrexisset, certò in periculum antea ignotum incidisset: post momento octavo redire ad considerandas expediendi negotii rationes, Dico sex primas cogitationes esse ortas, a principio interno, cogitatione pura præcedente, qua Pomponius est recordatus conficienda rei eo in loco, versus quem iter instituit. Deinde cogitationem septimo momento formatam, venire à principio externo, nempe ab Angelo-Custode: siue Pomponium ideo viam iniisse aliam, quia volebat Angelus, ut cogitaret aliam ineundam: denique cogitationem octavam, quia Angelus nonnisi septimo momento agit in Pomponii mentem, similiter deducendam ex principio interno.

Porrò noster Pomponius Museo inclusus solus per integram horã omnes suas cogitationes in arduo quodam natura, aut gratia mysterio contemplando defigit, nisi quod ejusdem horæ momento 40. & 41. interpellatur recordatione amici, vel inimici, cum quo eo de argumento nunquam est locutus, & quem a longo tempore, utpotè lon-

go intervallo à se diffitum, non vidit, deque eo nihil audiuit: mox momento 42. ad pristinam meditationem redit. Coniicio, momento 40. & 41. mentem Pomponii Romæ degentis determinari à mente Cai amici, vel inimici viventis tum Parisiis.

Iterum Pomponius momento primo cogitat, Deum conditorem tanquam ens præstantissimum, & optimum, esse amore, & honore dignum, secundo, tertio, quarto, quinto, & sexto animadvertit, miratur, laudat, & amat excellentissimam Dei naturam, & ea meditatione letatur, vehementer optans, ut ipsa mens sua indefinenter sit occupata. At verò momento septimo, octavo, & nono, suboriuntur in eo cogitationes, sancta, & excelsa Dei maiestate indigna: decimo anxietas de merita pœna: undecimo tristes ob offensum Deum benignum: duodecimo nascuntur vota remittendæ huius contumeliæ Deo factæ. Non dubito quin momento primo in mente Pomponii operetur Deus legislator, secundo, tertio, quarto, quinto, & sexto, Deus sâdere gratiæ ipsi iunctus: momento autem septimo, octavo, & nono, Angelus malus, seductor ille humani generis: decimo Deus iudex, undecimo, ac duodecimo, rursus Deus sâderatus.

Superesset denique ostendendum, quomodo baud rarò cogitationes mentis determinantur verè à corpore proprio, cum quo est artèssimè à Deo iuncta, sive à peregrinis, non tamen absque opera proprii: verùm quia mentem Philosophus noster

*noſter haud dum conſiderat ceu corpus habentem, idcirco reliqua ad ſextam meditationem rejici-
mus, ubi opportunus erit de virtute corporum
agendi in mentes differendi locus.*

*Caterum, ut ne iſta conjectura de determi-
natione cogitationum mentis unius per cogita-
tiones mentis alterius abſque examine prævio, ceu
ineptæ prorsus, & ridiculæ repudientur, oro lecto-
rem, ut duo hæcce probè ſecū perpendat: prius, res
cogitantes ſimul comprehenſas, nō minus quandam
inter ſe Rempubicam, veluti ac ſocietatem con-
ſtituere, ac res extenſæ faciunt unum orbem; po-
ſterius, ſi corpus unum, molem per ſe otioſam, &
inefficacem, credamus motu, quiete, figura, ſitu,
& quantitate ſua, vi legis à Deo factæ in rerum
primordiis agere in corpus alterum, nullam nos
ſcire cauſam, propter quam inſitiamur, mentem
unam cogitatione ſua poſſe deſcribere cogitationes
mentis alterius.*

AD MEDITATIONEM TERTIAM.

P*oſtquam Carteſius probavit mentem huma-
nam exiſtere, & ejus naturam in cogitando
poſitam eſſe, tranſit ad demonſtrandam Dei exi-
ſtentiam, quam univerſæ philoſophiæ fundamen-
tum ſubſternit: idque tantò libentius moneo,
quantò inde conſtat certius, neque authorem do-*

cuisset impietatem, vel Numinis supremi abnegationem, neque ullam dari aut sapientiam, aut religionem, nisi cognitione Dei nitatur.

Dei nomine, exprimitur insita animo idea Entis optimi, seu perfectissimi, uti jã Augustinus lib. 1. Doct. Christ. cap. 6. monuit. Nõ enim, ait, reverã instreptu istarũ duarum syllabarũ ipse cognoscitur; sed tamen omnes latinæ linguæ focios, cùm aures eorum sonus iste tetigerit, movet ad cogitandam excellentissimam quandam, immortalemque naturam. Et cap. 7. Nam cùm ille unus cogitatur Deorum Deus, ab his etiam, qui alios, & suspicantur, & vocant, & colunt Deos, sive in Cælo, sive in terrâ, ita cogitatur, ut aliquid, quo nihil melius sit, atque sublimius, illa cogitatio conetur attingere. Benedictus de Spinoza non quidem est infitatus Deum esse, reapse autem naturam divinam sustulit, dum per Deum nihil intellexit, præter compagem omnium rerum finitarum: quæ cogitatio, tam est absurda, philosophoque indigna, quàm est impia. Fac enim esse innumeras res per se finitas, quæ omnes simul comprehensæ, ex opinione Spinozæ, Deum constituent: nonne erunt hac in compage innumera imperfectiones; nam rebus singulis, quæ absolute non sunt infinitæ, aliquid deest? unde sequitur esse in Deo cumulum innumerorum defectuum, vel infinitarum imperfectionum. Falsissimum verò est, quod homo iste opinatur, ad essentiam entis absolute infiniti pertinere quicquid essen-

essentiam exprimit, & negationem nullam involvit. *Infinitem enim notat perfectissimum, quod sua natura est unum, & unicum: ubi namque sunt res multe, ibi essentia unius deficit alteri, v. g. corpori deest essentia spiritus: ubi est defectus, ibi imperfectio. Non ignoro Xenophanem, Anaxagoram paulò antiquiorem, tradidisse: unum esse omnia, neque id esse mutabile, & id esse Deum, neque natum unquam, & sempiternum, & conglobata figura: atque Zenoni, & reliquis ferè Stoicis æthera videri Deum summum, mente præditum, quâ omnia regantur. Teste Cicerone lib. 4. quæst. Acad. Quin aut non satis allequor mentem Peripateticorum, & Academicorum, aut ipsi quoque Deum cum harmonia mundi confunderunt. Idem lib. primo quæstionum Acad.*

Cartesius fuit imputatum, quod Deum in vanam, ac prætereuntē momento cogitationem transformarit: quæ sanè opinio summæ Dei majestati est contumeliosissima, & cum indignatione ad ortum releganda: sed eam fuisse authorem, vix permittunt credere ea quæ scribit part. prima principiorum philosophiæ §. 23. Et quamvis in nobis perfectio quædam sit, quod sentiamus: quia tamen in omni sensu passio est, & pati est ab aliquo pendere nullo modo Deum sentire putandū est, sed tantummodo intelligere, & velle: neque hoc ipsum ut nos, per operationes quodammodo distinctas, sed ita ut per unicam, semperque eandem, & simplicissimam actionem, omnia simul intelligat, velit, & operetur.

Non

Non opus est ut hoc loco recenseamus argumenta, quibus Philosophus Deum existere probavit, possunt enim ipso in volumine legi: & nostro quidem iudicio firma sunt omnia, nullaque arte queunt eludi: alterum tamen, altero est clarius, perceptu facilius, edque ad convincendos impiorum animos supremo de Numine aptius.

AD MEDITATIONEM QUARTAM.

Quanquam arduum sit ac laboriosum veritatis indagandæ studium, tamen & menti fit jucundissimum, ubi non est irritum, & vanum, nihil est enim ei veritatis luce dulcius, teste Cic. in Lucillum. Quare summa opus est diligentia, prudentiæque, ut verum a falso discernamus: signum autem, quo alterum ab altero dignoscamus indicavit Cartesius hac IV. Medit. esse claram, distinctamque perceptionem: qua in re veteres cum ipso consentire invenio. Perspicuitas illa, quam diximus (ex Tullio rursus loquor) satis magnam habet vim, ut ipsa per sese ea, quæ sunt, nobis ita ut sint, indicet. Mox lumen verum, ne cū præstigiis cōfundamus, jubet: sed tamen, ait, ut maneamus in perspicuis firmitus, & constantius, majore quadā opus est vel arte, vel diligentia, ne ab iis, quæ clara sint ipsa per sese, quasi præstigiis quibuscumque, & captionibus depellamur. Deinde
impe-

impedimenta perspicuitatis amolitur ? Quamobrem, inquit, cum duæ causæ perspicuis, & evidentibus rebus adversentur, auxilia totidem sunt contrà comparanda. Adversatur enim primum, quod parum defigunt animos, & intendunt in ea, quæ perspicua sunt, ut quantà luce ea circumfusa sunt, possint agnoscere: alterum est, quod fallacibus, & captiosis interrogationibus circumscripti, atque decepti quidam, cum eas dissolvere non possunt, desciscunt à veritate: oportetigitur & ea, quæ pro perspicuitate responderi possunt, in promptu habere, de quibus jam diximus: & esse armatos, ut occurrere possimus in interrogationibus eorum, captionesque discutere. *Quæ profectò sunt ipsa duo media, quibusquæ Author passim monet, nos claram, distinctamque veram perceptionem consequi: diligens nempe attentio ad rerum ideas, & definitio nominum, ad captiones, confusionesque evitandas.*

Sed fortè non abs re erit de vulgato exioma-
te: quicquid clarè, & distinctè cognoscitur: illud
verum est: nonnulla addere. Primum itaque po-
nimus, quod norunt omnes, veritatem passim, cum
in divinis, tum in humanis libris, cum luce com-
parar, errores autem, & mendacia, tenebris con-
ferri; inde intellectum assimilari speculo rerum
idea representanti. Deinde certum est, lucem
clarè lucere, ac suo se lumine commendare, neque a
caligine, & tenebris, nisi illius sensu dignosci: &
oculis quidem, cerebrumque, & mentem tam affi-

tere fortiter, ut si quis maximè tam vellet esse solidus, & tenebras pro luce, lucemque pro tenebris habere, stultis tamen his placitis assentiri requeat.

Sed non respondendum est iis, qui dicunt PeLAGIANUM esse, posse nos effugere errores, & in u-
dicando nunquam labi si velimus: si lubeat ad rem
animo propositam attendere tamdiu, donec clare
distinèteque eam percipiamus. Quæ sanè accu-
tio similis videtur transcripta in Medicum cul-
pæ, negasse virum bonum, & morbos, & mortem
inter humanum genus regnare, quod affirmasse,
posse nos tueri valetudinem, nisi luxu, & intem-
perantia velimus labefactare, & neglectis reme-
diis possundare.

AD MEDITATIONEM QUINTAM.

PLacet hic paucis refellere sententiam Spino-
sæ de essentia corporum, quam in extensione po-
sitam esse, Cartesius in principio huius medita-
tionis docet. Infaustus enim Philosophus iste,
quemadmodum unicam esse putavit substantiam,
eamque infinitam: quæ præter reliqua attribu-
ta nobis incognita, habeat extensionem, & cogita-
tionem, ita existimavit corpora, quæ existunt esse
modificationes substantiæ illius infinitæ, vel dei,
quotenus à nobis consideratur sub attributis ex-

extensionis. Per corpus, ait, intelligo modum, qui Dei essentiam, quatenus ut res extensa consideratur, certo, & determinato modo exprimit. *Et hic. part. 2. defin. prima. Quod ineptum pariter, & impium dogma, ut retundamus, primum extensionem haud esse attributum Dei; deinde corpora non esse modos extensionis, ostendere oportet.*

Atque prius quidem quod attinet, extensionem non esse attributam Dei, sive Deum non esse rem extensam: nullus, cui sana mens est, infutibitur, omnem rem imperfectam à Deo longè esse removendam. Ast quid aliud nisi imperfectiorem in extensione videmus, sive existentiam ejus, sive naturam intueamur? Nam existentia extensionis planè est contingens, neque necessaria, quia non existit vi suæ essentiæ: natura verò consistit in longitudine, latitudine, & profunditate, sive in possessione partium extra partes: Deus tamen neque partes habet, neque dividi potest, nam & habere partes, & posse dividi imperfectiorem involvit, sicuti per se patet, & ipse Spinosus agnovit, qui propterea esse individua corpora statuit. Porro limitata est extensionis natura, ita quidem ut non omnem contineat perfectionem, abest enim ab ea cogitatio, res perfectior extensione, haud parum præstantior: ac quicquid est limitatum, idem & imperfectum est.

Posterius effatum, corpora non esse modos extensionis, sed substantiis extensas, sive extensionem diversis modis vestitas, & affectum, facile
evin-

evincitur. Nam & modi sunt in substantia, & extra illam existere nequeunt; cera verò non intelligitur esse, nisi in se ipsa. Neque juvat dicere, ceram esse in extensione, potius enim advertimus extensionem esse in cera, tanquã attributum, ex quo corporea ejus essentia constituatur. Vel ceram non intelligimus instar adjuncti in subiecto, sed tanquam partem extensionis universæ, certis modis imbutam, & definitam, qui ad faciendam ceræ naturam necessarii sunt.

Tandem advertimus, modum, quo utitur Cartesius ad demonstrandam Dei existentiam esse desumptum ex illis verbis Anselmi in cap. 2. Proslogii, his verbis. Et quidem credimus Deum esse aliquid, quo nihil majus cogitari potest. Id quo majus cogitari nequit, non potest esse in intellectu solo. Si enim vel in solo intellectu est, potest cogitari esse, & in re, quod majus est. Si igitur id quo majus cogitari non potest, est in solo intellectu, id ipsum, quo majus cogitari non potest est quo majus cogitari potest; sed cerrè hoc esse non potest. Existit ergo procul dubio aliquid, quo majus cogitari non valet, & in intellectu, & in re.

AD MEDITATIONEM

S E X T A M.

Conficit denique Philosophus, præter res cogitantes, dari quoque res extensas, aut materiales, quæ sint generis à prioribus diversissimi, & vulgè vocentur corpora: è corporibus autem esse unum, quod modo peculiari ad mentem pertineat, & tanquam conjunctum cum ea spectari debeat.

Existere corpora primùm colligimus ex ideis, vel speciebus eorum in mente nostra expressis; ut enim imago, vel pictura testatur de re depicta; ita idea de corpore, cujus naturam representat. Nam animo humano obversantur species solis, arboris, ferri, lapidis, &c. quæ siquidem nō pro arbitrio à nobis finguntur, aut animadvertuntur, ab externo eas principio formari, mentique, interdum & invita, objici necesse est: quas fatemur ab ipso Deo produci, vel animo insculpi.

Alterum argumentum pro existentia corporum, suppeditant sensus, qui locupletes hoc denegatio testes sunt, nam arborem videmus, ventum audimus, florem odoramur, cibum gustamus, lapidem tangimus; neque ea in re, si organa sensuum rectè sunt constituta, decipi possumus. Nam secundum ipsum Cartesium dati nobis à Deo sunt sensus, ut illorum beneficio dignoscamus, quæ conservando corpori nostro sint utilia,

✠

• *salubria, quæ item noxia, & inutilia.*

Probandum nunc est inter tot, tamque diversa corpora, esse unum aliquod mirabile valde, & artificiosum, quod peculiariter ad mentem pertineat, & tanquam cum ea conjunctum spectari debeat. Ubi quidem à principio statim allegare nostram nos oportet famem, & sitim, qua mens cibum, & potum suos appetit in usus, etsi quum sit res cogitans, iis nequaquam indigeat. Igitur id corpus, cui victum petit, pro suo habet. Deinde læso, aut malè affecto machinæ hujus membro, dolet acerbè, & longè aliter quàm nauclerus quassatam navis partem miseratur. Iterum quando deambulare constituimus, spirituum pedumque motus promptè nostræ obsequitur voluntati.

Non arbitror, operam nos omnem esse perdituros, si paucula de miranda hac corporis, & mentis conjunctione hoc loco apponamus. Ut verò, & certior, & evidentior nostra fiat disputatio, explicandum prius est, quomodo corpus cum corpore, & spiritus cum spiritu jungatur, quàm ad declarandam corporis, & mentis conjunctionem accedamus.

Itaque corpus cum corpore jungitur superficie extrema, qua unum alterum tangit, postquam motu ad illud delatum est. Spiritus cum spiritu non aliter jungi intelligitur, quàm ubi alter alterius, sive intellectum, sive voluntatem, sive utramque facultatem cogitatione sua ad certum cogitandi modum determinat: v.g. quando in celo Angelus unus cogitat de morte filii Dei pro-
gene-

*genere humano tolerata, illa ipsa cogitatio oritur
& in altero Angelo socio ad laudem Dei Patris,
Filii, & Spiritus Sancti. Quando Pomponius
bene vult Cajo, in isto mutua voluntatis nascitur
erga Pomponium propensio. Cum anima huma-
na Filii Dei cogitat in vita cælesti de ineffabili
amore Dei Patris erga miseros homines, mox ea
ipsa cogitatio in omnibus, & humanis, & Ange-
licis mentibus formatur.*

*Corpus dicitur esse conjunctum cum spiri-
tu, quando cogitatio spiritus determinat statum
corporis, & vicissim status corporis certam in
mente, vel spiritu producit cogitationem. Ita pro-
positum mentis de ambulando, sequitur decursio
spirituum animalium è cerebro in musculos pe-
dum: vulnus autem pedi inflitum excitat in men-
tem confusam, & stupidam, injucundamque illam
cogitationem, quæ dolor appellatur. Facultates
mentis duæ sunt, intellectus, & voluntas, quarum
utraque à corpore patitur; nam per sensus, imagi-
nationem, ac recordationem, occasione motus spiri-
tuum animalium in cerebro, oriuntur certæ per-
ceptiones à purè intellectualibus, quas vocant, di-
stinctæ: voluntas verò determinatur ad varia de-
sideria, quibus absque hoc, illove corporis motu,
nunquam teneretur, uti sunt appetitus cibi, po-
tus, veneris, medicamentorum, &c.*

*Corpus menti à Deo datum est instrumen-
tum, quod uteretur ad quasdam actiones secun-
dum legem divinam; quare ut penna sequitur
da-*

ductum scriptoris, ita corpus est obnoxium nutui mentis ad implenda ejus desideria.

Nexus autem iste cogitationum animi, & status corporis humani, nequaquam pendet ab essentia utriusque substantiæ, tam arcto vinculo secum invicem conjuncta: nam quia sunt diversissima natura, altera quidem cogitans, altera verò extensa, una in aliam per se agere nequit; sed Deus conditor istud vinculum ligavit in prima creatione.

Neque enim omnes cogitationes mentis determinantur à corpore, neque omnes corporis actiones fiunt arbitrio, & imperio mentis; corpus enim absque jussu mentis, crescit, vel decrescit, respirat, &c. mens autem contemplatur ideas intellectui suo impressas, quanquam minimè corporis motu eam ad meditationem incitetur. Quod ergo nonnullæ actiones animæ, & corporis sunt connexæ, non omnes, documento est, istum nexum neque à mente, neque à corpore esse factum, sed a causa externa, Deo Creatore.

Ceterum ut corpus aptum sit mentis certis ad operationes instrumentum, non requiritur, nisi concinna, & idonea singulorum ejus membrorum dispositio, & pulchra secum invicem coagmentatio: moles verò, & statûra ingens, nihil eo faciunt, quod si enim exiguum, & breve corpus pygmaï, non minus inservit ipsius menti, quàm corpus hominis proceri, nulla dari potest ratio, quare tenella membra per se sint ineptum organon, cujus oc-
casio-

casione mens infanti nequeat habere dignas Deo Creatore, & Liberatore cogitationes.

Profectò neque magnitudo, neque parvitas calami facit ad bene, aut malè scribendum, sed apta illius scètio; quapropter quoddà mens infantum nostrorum, non eas ope corporis edit operationes, quas ab adultis proficisci cernimus, non exigua illorum statura in causa est, sed vitium organi pariter, ac mentis, peccato primo introductum. Integri enim, & Sancti si generassent primi parentes, quis dubitet, ipsorum liberos, non tantùm à prima infantia, sed jam ipso in matris utero, occasione corpusculi recta à Deo digna cogitatuos fuisse? Undè manifestò apparet, ut infantes sive ante partum in utero matris extincti, sive post partum in tenella ætate defuncti, apta fiant in altera vita amplificandæ Dei laudes instrumenta, nequaquam opus esse ut statura ipsorum augeatur: imò sapientiam, ac bonitatem, & potentiam Conditoris, tantò esse majorem, quantò plura, & magis diversu paravit illustrandæ gloriæ suæ organa.

Atque ista quidem nunc de mentis, & corporis conjunctione dicta sufficiant: duo tandem altius indaganda, eruditius proponimus; alterum quidem, annon mens existat ante formatum, & coagmentatum corpus, cuius particule tamen omnes, ac singule jam existunt, sed dispersæ in mundo, seorsimque posite: alterum verd, annon mens, quemadmodum à corpore ad certas determinatur

natur cogitationes, post quam est cū eo conjuncta, ita quoque nonnulla cogitet occasione seminis, ac ceterarum particularum, unde aliquando organon accipiet. Prius sanè affirmant Platonici tantūm, & Judæi; posterius absurdum nō videbitur, si consideremus destinationē ad conjunctionem jam certam menti ad corpus, & corpori ad mentem indidisse relationem. Unde colligeretur, etiam soluto per mortem vinculo, quo corpus, & mens erant colligata, inter antiquos sodales remanere aliquantulam cogitationum, ac motuum communio- nem, ac consensum. Ita mens sancta lataretur sciens corpus suum, peccati instrumentum, & il- lud præcipuè membrum, quo potissimum erat abu- sa, dissipatum omnino, & dissolutum esse: non aliter, ac gaudet homicida, facti pœnitentia du- ctus, quum novit gladium, quo cadem patravit, in ultra centum mille particulas diffractum esse. Absit verd istas ut quæstiones temerè adfirme- mus, quæ uti nos quidem existimamus non- dum satis sunt disputatæ ab eruditis, omnique ex parte consideratæ, tantum nihilominus momen- tum, ac pondus habent, ut accuratum, & curiosum Doctorum examen mereantur. *et cetera*

R I N I S.



